

BWENZEJI



Ncyà bushùwà. Ndi ngèèla meeji nè bìvwa bikèngela twètù kwimana kuulu patùdi tubala Dìyi Dyèndè. Kanwènaayikù nwela meeji nàнку anyi? Pa nàнку tùjuukilàayi kuulu bwà katanci kakesè cyanààna, patùdi tubala Dìyi Dyèndè apa. Ndi mbala, dilòòlò edi, bwà dìleesònà dyà mu Mifùndu dìdì disanganyibwa mu Mukàndà wà Yeshàayi, nshapità mwi6. Tèelejàayi nè ntèmà yònsò.

Mu matùkù akafwà mfùmù Uzìyà ngákamòna kàbìdì Mukalenge musòmbe pa nkwasà wa butùmbi, mutùmbùke... mubàndishùbwe, nè bizemba byà mùzàbì wèndè bìvwa byùjè ntempèlù tètè.

Kumutù kwèndè kùvwa kwimàne baselèfimà: yònsò ùvwa nè mapwápwa àsambòmbò; nè àbìdì ùvwa mubwikìle kwìsù, nènku nè àbìdì ùvwa mubwikìle makàsà, nènku nè àbìdì ùvwa ùbùuka naavù.

Nè umwe ùvwa wèla mukwèndè lubilà, wàmba nè: Wa cijìla, wa cijìla, wa cijìla, m'Mukalenge Nzambì wa bìlwìlu: buloba bujìmà mbùle tètè nè butùmbi bwèndè.

Nè makunji à ciibi àvwa ànyunga ku dìyi dyà uvwa wèla lubilà awu, nè nzùbu wàkuula tètè nè mwìshì.

Pashùshe mèmè kwamba nè: Dyàkabi dyànyi! bwalu kwànyi kwàjikì; bwalu ndi muntu wa mishikù mibùipe, nè ndi musòmbèle munkaci mwà bantu bàà mishikù mibùipe, bwalu mèsù àanyi mmamòne Mfùmù, MUKALENGÈ wa bìlwìlu.

Ke umwe wa ku baselèfimà kubùukayè kulwa kùndì, mwikàle nè dikalà dyà mudìlu mu cyanza cyèndè, dìvwàye mwangàte nè lukwàtù pa cyoshelu:

Ke kudìntwayè ku mishikù yànyi, nè kwambayè nè: Mòna, eci cyàlengi mishikù yèbè;... bubì bwèbè bùmùshùbù, nè mpèkaatù webè wàkezùdìbù.

Ngàkuumvwa kàbìdì dìyi dyà Mukalenge, dyàmba nè: Nganyì ùngààtumà, nè nganyì wàya kaaba kètù? Pashùshe mèmè kwamba nè: Mmèmè ewu; ntùmaaku.

2 Twìnyikàayi mitù yètù mpìndyewu.

3 Taatù, “dyàkabi,” tudi tudyùmvwa mùshìndù wùm wèwùm wè wàkadyùm vwa Yeshàayi awu nè: “Dyàkabi dyètù! Bwalu mèsù ètù mmamòne Mfùmù, Mukalenge wa Butùmbi.” Tudi tuKusàkidìla, Mukalenge, bwà mùdìku njìla wa dìkezula, dilòòlò edi, udi kàyì mwà kulenga ànu mishikù yètù nkààyaayi to kàdì myoyi yètù nè misùuka yètù, nè kutùkezula ku bukooya bwètù bwònsò. Bwalu bìdì nè, mu bulèlèlè, tudi

basòmbèle munkaci mwà bantu bàà mishikù mibiùpe, nè mishikù yètù, kàbìdì, mmikooyike. Tudi tulòmba bwà Nyumà Mwímpè munène awu àlwekù àlengè mishikù yètù nè myoyi yètù nè dilaabiibwa, Kapyà kàà Nyumà Mwímpè káfumina ku cyoshelu cyà Nzambi, nè kàtùkezùlèku ku bupidyà bwètù bwónsò nè mpatà, bwà Wàbwelakù nè wàvwija cisòmbedi Cyèndè munkaci mwètù. Bwalu, tudi baMunangè, nè tudi tuMukuukwila, nè tudi tuMukuukwila. Tudi tulòmba, Taatù, dilòlò edi, kwòkò muntu kaaba aka udi kàyì mwanjì kupeta dilengiibwa dyà dikezudiibwa dyà kùdì Nyumà Mwímpè munène awu to, Kapyà kàà Nzambi, bwà nè dilòlò edi mudimu ewu newènjiiibwè munda mwàbò bwà bwalu bwà Bukalenge bwà Nzambi. Tudi tulòmba nùnkù mu Dìnà dyà Yesù. Amen.

Nudi mwà kusòmbaayi.

⁴ Mpindyewu ndi . . . nènteetè bwà kupàtuka kumpàlà kwà díbà. Ncyèna muswè bwà nùpangilè kàlaasà kàà Dyàlumingu to. Mpindyewu, kakwenà bwalu to wèwè mupùmbisha mudimu ditùkù òmwè, kabyàkutàmba kukutàcisha to kàdì; mwwa munùlamè too nè pa díbà citèemà nè tusunsa makùmi àsàtù, anyi cintu bu nànkù, dilòlò adi. Kàdì kanùpùmbishi kàlaasà kà Dyàlumingu to, nànsha cyùdì wenza ciikàle cinyi.

Mpindyewu cyena-bwalu cyànyì dilòlò edi cidi nè: *Bwenzeji*.

⁵ Twètù baswè kubala bwalu-bulonda ebu, bìvwa bìkèngela twètù kubuulula mu Kulondolola Mwibìdì, nshapità wa 26, nènku nudi mwà kucibala. Uzìyà ewu ùvwa mwànà wa balùme mulami wa mikòòkò. Nè yéyè, Kulondolola Mwibìdì 26 ùdì ùtwàmbila, nè ùvwa mwediibwe maanyì bu mfùmù muciiikàle nè bidimu dikùmi nè bisambòmbò. Nènku tatwèndè wa Uzìyà, muntu wa difwànà dyà Nzambi. Nènku muntu ewu ùvwa muntu mwímpè, mwikàle nè baledi bàà difwànà dyà Nzambi: “Wàkenza civwà cijaalàme ku mèsù kwà Mukalenge.” Mpindyewu tudi tusangana nè pa ciibidilu . . .

⁶ Ndi—ndi ngèèla meeji leelù ewu nè, lutàtù lwètù lunène, lwà citùdì twela meeji nè buntòmbòjì bwà bânà, m’buntòmbòjì bwà baledi, buntòmbòjì bwà mu dikù. Cisàmbà cyètù—cyètù ncyumùke ku bintu bivwàci—bivwàci nè cyà kushààla naabi. Èkèleeziyà mmushààle civùmvù anyi mukwàte mashika, nè bà—bânà mbabwelè mu byà pa buloba.

⁷ Mpindyewu Hollywood ùdì ùpàtula filmè yàbúngì nè— nè ntèlèviziyò, nè bikwàbò, byà bwalu abi kabìyì nànsha bikenkèciibwe to, mwaba wùdìbo bèèla mulawu nè—nè—nè bàtèèla Dìnà dyà Nzambi citèlàtèèlà. Nènku—nènku kale wàwa bìvwa bibi bwà bânà bàà mu èkèleeziyà yà cijila bwà kuya ku—ku—ku sèndemà yà tulòndò anyi sèndemà, kàdì mpindyewu Sàtaanà ùvwa mutùpìke yéyè kumpàlà, pa kubibweja buludi mu nzùbu, mu mmwènekèlu wa ntèlèviziyò, nè pashiishe kabiyi

bikenketa to, nè—nè bikwàbò. Nènku ke mùshindù wùdì Sàtaanà ùbwela ku kakesè ku kakesè.

⁸ Mwàkadì dinàya dyà bàpulumuka mu lubùwà kale wàwa. Bàbúngì bàà kunùdì kí mbadivùlùke to, bwalu nudi bàná batekète. Pa ciibidilu cívwa dinàya dyà bàná; nusòmba pa mpulumuku nè nubanga kupulumuka nunyùnguluka, ànu kunyùnguluka. Kùvwa disòsù, cibila, nènku muntu yònsò ùvwa mufwànyine kwela mukwèndè kadyòmbò, bwà nè nganyì uvwa mwà kutàmba kuseemena pabwìpì naadi. Nènku paanyimà pàà katanci, kumpàlà kwà wèwè kucimanya, [Mwanèètù Branham ùdì ùtuuta cishòndò—Muf.] ki wèwè wàpwèkì wàyi awu.

⁹ Ke mùshindù wùdì mpèèkaatù awu. Kunàyikù nendè to. Kùtàngidi mùdì mwà kuseemena nendè pabwìpì to. Mòna mùshindù wùdì mwà kushààla kule nendè. Nwamònu anyi? Kanùnàyikù nè kapyà to. Wèwè muswè kunàya nè kapyà... Mémè ncyèna muswè kùnàyakù nè kapyà to.

¹⁰ Mununu kampànda wa cyena Ecosse, musangu kampànda, mwàkambàbo, ùvwa nè cyà kuya dyàmwàmwa dyà mukùnà kampànda. Nè matempu àvwa mindile, muntu yònsò ùvwa muswè kumwambula kuya nendè dyàmwàmwa. Yèyè nè: “Ndi muswè mwendeshi mutàmbe bwìmpè bwà kungambulayè.”

¹¹ Ki umwe wa ku bòbò kwambayè nè: “Èè, ndi mwà kunyemesha tùbalù twànyì tùsambòmbò mu lùbilu lukolè nshiya ntàntà wa—wa byàlà díkùmi nè mwelelu wà mukùnà awu.” Kukùluka, ndufù. Yèyè nè: “Ndi mwendeshi mwìmpè bwà kwendeshà tùbalù twànyì, mu dikùbiibwa, mwab’awu, mu ntàntà wa byàlà díkùmi nè nkàtà yànyì, nè nciyi mwà kukùluka to.”

¹² Mukwàbò pèndè kwambayè nè: “Mémè ndi mwà kutàmba aci. Ndi mwà kwendeshila mu ntàntà wa byàlà bìsambòmbò, anyi mu ntàntà wa byàlà binaayi, kàdi nciyi mwà kukùlukakù to.”

Yèyè nè: “Kàdi bìshi bwèbè wèwè, mukalenge?”

¹³ Yèyè nè: “Èè, ncyèna mumanyè to. Ncitu muswè kwenza nàнку to. Ndi—ndi ànu nkwàta ku mubàngubangu aku.”

Yèyè nè: “Wèwè ngambùleku.” Ncyà bushùwà. Ke yèyè awu.

¹⁴ Kí mmùshindù wùdì mwà kuseemena pabwìpì to, nè mùshindù wùdì wela meeji nè udi mukolèshìibwe bilenga byà bìshi, shààla wèwè ànu kule menemene nè mpèkaatù nè mwèbè mwònsò mùdì mwà kushààla awu. Ndà wèwè ànu kule menemene nè mwèbè mwònsò. Wèwè udi wamba nè: “Èè, mémè’s ndi mwà kwenza *cikampànda*. Kakwèna bwalu bubi mu kwenza kwà *nàнку* to.” Èè, kwòkò mpatà mu meeji èbè, kucyènjiku to nànsha kakesè. Mwaba kanà wònsò wùdì mpatà, shààla kule naawù. Dìbà adi, nudi numòna’s, dìbà adi kakùyì mpatà to wèwè udi nè mwoyi ku diitabuuya, pìikalàku kakùyì mpatà to. Kòkò

kwikàle mpatà, dībà adi cilekèle, kùseemenyi naaci pabwìpì nànsha kakesè to.

¹⁵ Nènku ndi ngèèla meeji nè misangu yàbúngì mbaledi ke bàtù buumuka; Ndi mumanyè nè kùtu misangu mikwàbò bi—bilongelu, nè bikwàbò. Nènku kàlaasà kàà Dyàlumingu bu cyàbìbìdì cimwè cyà dībà nàнку awu, anyi dībà òimwè mu dyàlumingu mu dindà, nè bàà pa buloba bàdi nè bānà munda mwà lumingu lujimà, nè bàbàpàya bintu byàbúngì kutàmba mulongeshi. Nènku misangu yàbúngì, misangu mipitèpìte búngì, mulongeshi ùdi nè ndambù wa tusunsa dikùmi nè tùtaanu tùdiye ùlongesha, pàdiye ùdilaaba tupenta ku mishiku nè ùlongolola nsuki yèndè, ùlekela bānà bènza mùdìbo mwà kwenza.

¹⁶ Nènku pashìishe kumbèlu kabèèna bàpeta dilongesha dyà bwena Kilistò to nànsha kakesè. Maamù ùdi pambèlu pàapa mwaba kampàndà mu ditwà dyà kartà, nè taatù mupwékè ku nzùbu wa manàyi, nè—nè mwanèètù wa bakàjì ùdi pambèlu nè muntu kampàndà nè kàshinyi kàà sport. Nènku's ke bwalu mbwòbù abu, nwamònu's. Ncinyi, mpenyi patùdì—mpenyi patùdì tuya's? Nudi ànu, cidi ànu cidi. . . Mbìbì be. Nè pashìishe tudi tujandula nè bintu byònsò ebi pàmwè. Junior mupàtuke, wènda ùbànda ùpweka nè mùsèèsù munkaci mwà kunàya, pa ntukutuku wèndè. Nènku, kaa, bàmwè bānàya ndundu wa tubwengè nè bakwàbò bānàya mààbí, nènku ncintu kampàndà bwà kusànkishibwa. Nè èkèleeziyà mmulekela.

¹⁷ Misangu yàbúngì, pashìishe bàdi nè kasùmbù kaa balombodi muntwamu; bu mpaasàtā awu mwà kulenga kaabwalu kampàndà kakesè kàvwà—kàvwà kènzè bu kàbèngangana, anyi wàmba cintu kampàndà pa bwalu abu, kasùmbù aku's nkafwànyine kumubiikidisha, dīnà dyèndè ndifwànine kuya ku ciimamwèndè wa bukalenge nè yèyè ùvwa mwà kwipaciibwa. Nàнку, nudi numòna's, ncilwè tikè wa byàkudyà, pamutù pàa musadidi mulaaba bwà kuyiisha Èvànjeeliyò. Nwamònu anyi? Ncyà bushùwà. Ncishàale cintu cidìbo baswè. Cidi—cidi n'tikè wa byàkudyà. Bàdi nè cyà kushàala mwaba awu, kupeta difutu dīmpè. Tèèlejà, mwanèètù, Nzambi ikàlàku luse nè muntu udi mufwànyine kusùmbisha bwanààbutè bwèndè bwà cyòci aci. Tèèlejàayi!

¹⁸ Tudi dikèngela nè muntu wíkala mwà kwambula Èvànjeeliyò, byanza bitupù, kàyì mwelè gants kampàndà yà cyena-màngumba ku byanza to. Kumwadija mwab'awu ànu mùshindù wùdiye mufundùbwe awu, nè—nè kulekela bipàtu bimata kwàswàbi aku. “Cisàbaatà cyòci cikùmbàna,” mààmù ùvwa nè ciibidilu cyà kwamba nè: “civwàle.” Wàmba nè: “Kùsonji ditala dyèbè to.” Mpindyewu, pa nàнку tudi nè bintu bìvwà bikèngela twètù kwikala tutèèleja.

¹⁹ Mpindyewu, mfùmù ewu, Uzìyà, mwikàle mwànà mulenga wa dikèma. Ùvwa nè taatù wa difwàna dyà Nzambi. Mamwèndè

ùvwa mufùmìne ku Yelusàlèrà, nè taatù wa difwàrà dyà Nzambì uvwa mfùmù kumpàlà kwèndè, nè dilongesha dyà mùshindù awu dyàkapòngolokela munda mwà nsongààlùmè awu.

²⁰ Mémè ncyèna ní n'Démocrate ní n'Républicain to. Ndi mwenzè ànu disungula òmwèpelè, nè diine adi òvwa mbwà Kilistò. Nè Yèyè ùdi—Yèyè ùdi. . . Mémè nèncimunè nè Cyòci aci.

²¹ Mpindyewu, ndi—ndi ngèèla meeji nè Mfùmù wa ditùnga mutàmbe bunène, nànsha nànkù, utùkaadikù bapetè, ùvwa ng'Abraham Lincoln. Kì mbwalu nè yèyè ùvwa mwena Kentucky, yèyè pèndè to, kàdi mbwalu muntu awu mmufùmìne ku cijèngù. Nènku mikàndà yònsò yìvwàku muntu awu mupetè kacya, kwambwila ànu mu cikondo cìcìvwàye nsongà, ngèèla meeji, too nè mwà kakolàye, cìvwa m'Bible nè—nè *Ditanta Dyà Mwena Lwendu* dyà Bunyan. Nwamònu's, aci cyàkafùmba munda mwèndè (cinyi?) “Abe wa meeji matòòke” awu. Yèyè. . . Cyùdi ubala, cyùdi wenza, ke cìdi cìfumbà ngiikàdilù webè. Cìdi—cìdi cyàmbe cyùdi. Nènku mpindyewu, nudi numòna's, yèyè wàkabala mwaba wùvwà nè “wèwè mwenze bibì, udi ufuta bwà cyòci aci; wèwè mwenzè bìmpè, Nzambì mmufwànyìne kucitwa mushinga,” nènku cyòci aci cyàkamufùmba cìvwàye aci. Nènku mamwèndè, kàbìdi, mukàjì wa—wa difwàrà dyà Nzambì's. Yèyè nè: “Kwòkò kwikàle luumù kampàndà lwà kupèèsha muntu kampàndà, ùvwa mmaamù wa difwàrà dyà Nzambì,” wakamukolesha mu mùshindù mujaalàme. Mpindyewu aci kwenzaci, ngèèla meeji, ndi mufwànyìne kwamba nè, nànshakù umwe wa kùdìbo, piikalàye kàyì Mfùmù wa ditùnga wa mutàmbe bunène utùkaadi bapetèku. Yèyè wàkafùmìna ku bitupù, kàdi Nzambì kumuvwija Mfùmù wa ditùnga bwalu ùvwa muntu wa meeji matòòke nè muntu mwìmpè.

²² Mpindyewu, tudi tusangana nè mwànà wa balùme ewu ùvwa mwómùmwè. Mwikàle nè baledi bàà difwàrà dyà Nzambì aba, wàkenza cìvwà cijaalàme. Pààkavwijiiibwàye mfùmù, nènku pàvwàye nè bidimu dikùmi nè bisambòmbò, wàkalèngulula cìdiidi cyònsò nè mmwènenù yà mwasàkànaayi yà ditùkù dyèndè, kàdi wàkawkàcila Nzambì mudimu nè kaneemu kààbùngì. Cyòci aci cyàkamuvwija mfùmù mulelèlè. Bwà kulèngulula cìdiidi nè mmwènenù wa cyena leelù, nè kukwàcila Nzambì mudimu nè kaneemu kààbùngì, aci's cìvwa cìmpè cyà dikèma. Bukalenge bwèndè, Nzambì wàkabùbènesha, bùvwa bunène mu mùshindù wà nè bwàkalondela bwà Solòmò. Nè Solòmò ùvwa nè bwà butàmbe bunène bùvwakù; kàdi mwànà wa balùme ewu ùvwa mulondèle Solòmò, mu bukalenge bwèndè.

²³ Cìvwa di—dikwàcisha dinène kùdi mupròfetà wa citende Yeshàayi ewu, nè bu mùvwàye nsongààlùmè mu cikondo aci, mwikàle ànu ùcìbangilakù. Bu mùvwàye mulediibwe mupròfetà, ùvwa ùtàngila bwenzeji bùvwà muntu ewu naabù pa

bantu; nè mumòna kùvwà bwenzeji bwèndè bufùmìne, bwalu wàkeeyemena Nzambi, nè dishindika dyònsò. Nènku wàkadi nè . . . Wàkamòna kàbìdì, yèyè Yeshààyì's, mwikalà Nzambi mwà kubàbènesha aba bìikalà nè lulamatu ku Dìyì dyà Nzambi abu.

²⁴ Mpindyewu tudi bamanyè nè nsongààlùme ewu ùvwa muswè kushààla nè mèyì makùlù à cìvwà Nzambi mwâmbè. Yèyè wàkashààla mulamè mèyì Èndè matùma. Uziyà kàvwa mwà kuya ku dyàbalùme anyì ku dyàbakàji. Yèyè wàkashààla ànu nè cìvwà Dìyì dyâmbè, ke Nzambi kumutwà musinga nè kumubènesha mu byònsò bìvwàye wèza, kutantayè, mutùngùnuke ànu nè kuya. Nci—ncileejilu kaayi cìdì bwà nsongààlùme kanà yònsò ewu's wè!

²⁵ Ndi ngèèla meeji nè bu nè tuvwakù nè bantu leelù ewu, èkèleeziyà yetù yidì yamba nè mbeena Kilistò ayi, bu bôbò mwà kudilaminina ku bintu byà pa buloba nè kwikala nè nsòmbelu wa mùshindù mwoyi awu, bìvwa mwà kufila bwenzeji kùdì beena Kilistò bàà bitende bwà kwenzabò nàнку awu. Kàdi, leelù ewu, pàdìbo bàteketa mu mabòko, bànwà maalà nè mfwankà, nè bènza maalù à lukutukutu, kàdi bìikalà ànu bàteeta kulama ditonda dyàbò dyà bwena Kilistò, aci's cìdì cìtèèka dibwe dyà cilèndwishì mu njila wa bantu bakwàbò, nè bìbàlwila bikolè be.

²⁶ Vùlukààyi nè, Bible mmwâmbè nè: “Nudi mikàndà mifùndilangana, yidì nè mwoyi, yidìbo bàbala kùdì bantu bònsò.” Mpindyewu, bantu bààbùngì kabàtu bàbala Bible to, kàdi Nzambi mmukuvwiye muleeji mpàla udi nè mwoyi. Wèwè's udi mukàndà mufùndilangana wà wènda, uvwa nè cyà kwikala Bible udi wenda, Kilistò munda mwèbè. Bìvwa bìkèngela wèwè kwikala Dìyì dyà Nzambi didì dyènda. Kàdi wèwè ujìkula mùdì mwena Kilistò, kàdi kùyì aci to, bwenzeji bwèbè, bwèbè. . . Cyùdì ufla bu bwenzeji aci, necìkufikishè ku dilumbulula bwà misùkà yàbùngì yùdì mupàmbwishe, kule nè Kilistò, mu Ditùkù dyà Cilumbulwidi adi.

²⁷ Ndi ngèèla meeji nè mbilààle kutùdì, dilòlò edi, bwà kwela meeji pa bwalu abu, bwlu mulùme yònsò, mukàji, mwànà wa balùme nè wa bakàji, mmumanyè nè udi upicila ku Cilumbulwidi. Udi mufwànyine kupànduka ku *cikampàndà*, *cikansanga*, anyì *cikankènga*. Udi mwà kucìmuna citàdì cyà makàsà à musinga wèbè, nè udi mufwànyine kupànduka ku Difuta dyà bitàdì pa byùdì mupetè ku musinga. Udi mufwànyine kwenza cintu cìmwè anyì cikwàbò. Udi mufwànyine kupicisha mikàlù yà lùbilù lukòsa kàdi baampùlushì kabàyi bakukwàte to. Kàdi, dīngà ditùkù, Cilumbulwidi necìkukwàtè. Aci's ncyà bushùwà!

²⁸ “Nènku's tudi bamanyè nè muntu ùdì nè cyà kufwà, nè paanyimà pàà cyòci aci Cilumbulwidi.” Lufù kī ncintu cikolè to. Cilumbulwidi paanyimà pàà lufù, ke citùpà cibì ncyòci aci. Nè mwaba awu, cyùdì mwenzè mu nsòmbelu ewu, nè mùshindù

wùdi mwenzèje bakwàbò, nebikengelè bwà wèwè kulumbulula bwà bwalu abu mu Ditùkù adi.

²⁹ “Mmunyi mùvwàbi bikèngela bwà twètù kutàmba kutèeka ku luseke bujitu bwònsò, nè mpèkaatù ùdi utùjìngila bipeepèle nùnkù, bwà twamòna mwà kunyeema nè lutùlù lubilu lùdi lutèeka kumpàlà kwètù elu, batàngile,” kí nku twitabàayi, ku dìngumba, kùdi muntu mukwàbò kampànda to, kàdi: “kùdi Yesù Kilstò Udi mubangi nè mujikiji wa Diitabuuja dyètù.”

³⁰ Mùshindù mwinè wùvwàbi bikèngela bwà twètù kwikala twela meeji ku bintu abi’s, balundà bàanyi, nè disù dikolè nè kaneemu kònsò, patùdi tumòna Ditùkù edi dyènda disemena apa, nè mumanyè nè díbà kanà dyònsò mabèji à mwoyi wèbè, mukàndà awu, wùdi mwà kukàngiibwa dilòlò edi, nè màalabà díbà nedìikalè dimanè kupita bwèbè wèwè bwà kucyènza. Kulaadikiji cyùdi mwà kwenza leelù ewu, bwà màalabà to, bwalu màalabà ùdi mwà kubènga kulwaku. Balùme nè bakàji, nsongàalùmè nè nsongàakàji, bàdi mwà kwikala basòmbe kaaba aka dilòlò edi, biikalè mu nzùbu wa bitàlù kumpàlà kwà bufuku kucyàbu. Mbulelèlà. Nè díbà adi mukàndà wèbè mukàngiibwe, nè kwàdyakupetakù mpùngà mukwàbò nànsha. Eci cidi mwà kwikala mpùngà wa ndekeelu wuwikalèku nendè. Elà meeji ku bwalu abu, nè disù dikolè. Wèwè udi wamba nè: “Èè, pàmwàpa kabyèna nànkù to.” Pàmwàpa kabyèna nànkù to, kàdi’s mbifwànyine kwikala nànkù’s. Kàdi, vùlukàayi nè, dìngà ditùkù mukàndà awu newukangiibwè, nè cinùdi munkaci mwà kwenza mpindyewu eci.

³¹ Nè nangananga nwènù bàdi balaka mukana nwamba munùdi beena Kilstò abu, tàpulukàayi nè maalu à pa buloba. Kwikadi nè cyà dyanza nànsha cimwè nè maalu à pa buloba to. Bùnyeeme, bwalu muntu kampànda ùdi munkaci mwà kukutàngila’s. Muntu kampànda ùdi munkaci mwà kukutàngila. Nènku wèwè kwakuditùma ànu wèwè nkààyebè kuntwaku to, kàdi nèuye naabò too nè mu mwaba mubi, nènku nebikengelè bwà wèwè kulumbulula bwà bwenzeji bwèbè.

³² Mùshindù mwinè ùvwà mupròfeta ewu mutàngile muntu ewu, nè mumòne nè Nzambi wàkamubènesha, nè mùshindù mwinè wùvwà bwenzeji abu’s wè! Mùshindù mene wàkatanta muntu awu, cyàkamwenzela Nzambi’s. Úvwa nè nsòmbelu uvwa—uvwa mulenga wa dikèma, mubènèshìibwè kùdi Nzambi, nè kàvwa muswè kukùdimuka ní nku dyàbalùme ní nku dyàbakàji to.

³³ Mpindyewu apa tudi tusangana cileejilu cikwàbò mwab’ewu mu muntu ewu, muntu ewu Uzìyà, mfùmù munène wàkenda kale wàwa nè Nzambi. Bible mmwambè nè: “Pàakadyùmvwà mfùmù nè yèyè ùvwa mukùbiibwe, kudyùmvwa nè ùvwa bimpè, díbà adi yèyè kubàndishìibwa mu mwoyi wèndè, nè maditàmishi.”

34 Lekèlaayi ngiimanè mwab'ewu bwà kwamba bwalu ebu, kakuyi tuseku to, mwanèètù wa balùme, mwanèètù wa bakàji. Nzambi mmunwenze batèèleji bàànyì dilòlòlò edi. Ndi nè cyà kwikala nè dísù dikolè dyà menemene mu cìndì ngàmba, nè nudi nè cyà kutèeleja nè dísù dikolè dyà menemene.

35 Ke lutàtù lùdì naalù bantu bààbùngì leelù ewu alu. Bàdì bèèla meeji nè. . . Tudi nè bàmwè bàà ku bàna bèètù bambi, bàmwè bàà kùdìbo bàtu bàfika pa kaaba kampàndà, pàmwàpa, nè midimu minène yà bwambi, too nè mùdìbo bàdyùmvwà mu dikùbiibwà. Tukàadi bacìpetè, nè bamanyè nè ncilelèlè. Bambi bààbùngì mu ditùnga leelù ewu mbabange kunwà maalà. Bàmwè bàà kùdìbo bàdì bèèla meeji nè: “Èè, ndi nè bukalenga bwànyì bukesè bwibaka bunyùngùlùkile. Kakwènakù kabingilà bwà mèmè. . . Bantu abu mbannangè bikolè menemene, mu mùshindù wà nè kabàadyàkutèyàkù ntèmà nànsha mikesè to mèmè mwenzè *cikampàndà* anyi mwenzè *cikansanga*.” Lekèlè nkwabìlè, mwanèètù nè, kùdì Kampàndà Udi mutàngìle, nè mwìnè awu n'Nzambi. Muntu nànsha umwe kèna mu dikùbiibwà to pambèlù pa Nzambi.

36 Mìngà misangu tutu tukafika mu mùshindù wà, twela meeji nè: “Nzambi ùdì ùtùbènesha. Mmumpèèshe Cadillac. Mmumpèèshe mudimu mutàmbe bwìmpè. Mmumpèèshe *cikampàndà*.” Aci kí ncimanyinu cyà nè kwèna mwà kuumusha mabènesha Èndè kùdì to.

37 Paùdì ubàndishiibwà, nè umvwà nè: “Èè, musangu kampàndà mvwà mulàale bufùkù bujimà nsambila, musangu kampàndà mvwà ngènza *cikampàndà* nè ngènza *cikansanga*, kàdì ncicyenà ncyènza kàbìdì to,” wèwè udi mu mwaba wà njìwù.

38 Ke lutàtù lùdì naalu beena Mpenta bèètù ndwòlò alu. Pààbì, kale wàwa, kùkaadi ntàntà mule, patùvwà nè masangisha ètù makesè kwìnshì eku mu disangu mwaba kampàndà, nè bakàji kabàyi bavwàle nshèsheetè mile bìmba mutumbi kwìnshì kwàka, bàvwà nè cyà kusambila bufùkù bujimà, nè bikwàbò byònsò; baampùlushì bàvwà bànwèla mu bùlokò, nè nuwva nushàala mu bùlokò, nè bikwàbò. Nuwva nusambila. Maèkèleeziyà, màngumba ónsò, àvwà ànùseka nè ànwèlulwila. Kàdì mpindyewu Nzambi mmunùbàndishe, too nè muwàpecì yimwè yà ku èkèleeziyà yà mitàmbe bwìmpè mu ditùnga, màngumba manène à bukolè, nwènù è kubanga kudyùmvwà mu dikùbiibwà. Dìmukàayi, adi's ke dìbà dinùdì nubàndishiibwà. Dìbà adi, pàdì Nzambi ùtùma Cintu kampàndà, kwèna mwà ku Cìitabakù kàbìdì to, bwalu ukàadi mumanè kufila bujaadiki bwà *cintu* eci. Dìbà adi udi ubanga kudyùmvwà mukùbiibwè, ke dìbà dyùdì mu njila mutàngìle ku cibùlà cyèbè ndyòdì adi. Aci's mbwà màngumba. Aci's mbwà matùnga.

39 Tàngilàayi ditùngà dyètù, musangu kampàndà's dìvwà

dimwè dyà ku matunga manène à nsòmbelu mulenga à pa buloba. Ditàngilaayi aku leelù ewu's, ke cintu cyà kusekabo cyà buloba bujimà, nè bukooya kupita ní cinyi ní ncinyi cyònsò cindiku mumanyè.

⁴⁰ Ndi mwenze ànu ntùuluka mu ndèkè, nè mbwela mu Loomò, nènku nya ku Sant' Angelo, bwà kubwela mu nkità yà mwĩnshì mwà buloba ayi, mèmè kuumvwa bundù pàngàakamòna cimanyinu citèeka ku—ku nkità yà mwĩnshì mwà buloba yà mu Sant' Angelo ayi, cyamba nè: “Mwàkù bwà bakàjì bònsò bàà beena Àmèrikè: Bu nwènu mwà kuswà lwàtaayikù bilàmbà pambidi kumpàlà kwà kubwela mu nkità yà mwĩnshì mwà buloba eyi, bwà kuneemeka bafwè.” Bàbwela muntwamu bavwàle tùpùutùlù, nè mipanù, mu mwaba bu mùdì mu Loomò amu; nè pashìishe bìvwa bikèngela kwambabò: “Kùdì bakàjì bàà beena Àmèrikè: Bwà kutwà bafwè mushinga, nè vwàlaayi bilàmbà.” Mòna's, s'ncilwè cimpèpèmpè cibì mu mimpèmpè yà dyùlu! Nè mfrangà yètù yònsò yà dyàmwàmwà dyà mbù ayi, nè mfrangà misombeshangana, nè bikwàbò byònsò mùshindù awu, kabyàdyàkusumbakù bulundà to.

⁴¹ Cidì citùkèngelà mu ditunga edi, nè katwàdyàkucipeta to, kàdi cidì citùkèngelà ncikondo cyà—cyà dizekula dyà nzùbu; kì ndikezula dyà nzùbu dyà cididì to, kàdi nditàbuluja dituma kùdì Nyumà Mwimpè diikalà mwà kumukòmba kubangila kuulu too nè kwĩnshì. Ke cidì cikèngela èkèleeziyà yètù aci. Ke cidì cikèngela bantu bèètù aci. Ke cyòcì aci, bu bantu-nkààya, cidì citùkèngelà. Bwà bwenzeji bwètù. . . Patùdì tudibàndisha nè twamba nè: “Mèmè ndi mwena Mpenta. Nkàadi mwakùle mu myakulu. Nkàadi mwelè mbilà. Nkàadi mujè maja mu Nyumà.” Udi mufwànyine kwikala mwenzè nànkù, kàdi lekèlè nkwambilèku cintu kampàndà, mwanèètù, aci kì ndikubiibwa bwèbè wèwè to, nànsha kakesè.

⁴² Tudi tusangana nè pàakabàndishiibwà Uziyà mu mwoyi wèndè, tudi tusangana nè Nzambì wàkamutuuta. Cyàkenzàye ncinyi? Wàkateeta bikolè bwà kuteeta kwangata mwaba wà mwambi kampàndà. Wàkeela meeji nè bwalu wàkadibàndisha, Nzambì wàkamubènesha, kumuvwija muntu munène, ùvwa ànu mwà kwenza cyònsò civwàye muswè kwenza aci.

⁴³ Mvwa muumvwè nsongàalùmè kampàndà ùngambila kì nkwanji kwenza ntàntà mule to, wàmba nè: “Udi mumanyè's, Nzambì mmunnangè bikolè be, Mwanèètù Branham, Yèyè ùtu ànu ùdekela ngènta cyònsò cindì muswè kwenza aci. Kàtu ùbùcyùka to.”

⁴⁴ Ndi ngùm vwa byàbúngì leelù ewu byà mùdì Nzambì mwikàle Nzambì mwimpè. Ke cidìYe. Ncyèna ngèèla aci mpatà to. Yèyè ùdi Nzambì mwimpè. Kàdi Yèyè ùdi kàbidì Nzambì wa ciiji cicolè. Cijila Cyèndè cidì cilòmba bwakàne. Mikenji Yèndè yidi yilòmba cilumbulwidi. Kwòkò kakùyì cilumbulwidi

cyà mikenji to, mikenji kayèna nè dikwàcisha nànsha òmwè to. Mbifwànyine kwikala bimpè ku cinyi bwà kwamba nè: “Bidi bibèngangana nè mukenji bwà wèwè kunyeemesha kusambuka mudilu mukünzè wùdì kwínshì eku,” pàdiku kakùyi cibawu paanyimà pàaci? Nwamònu’s, kí ncifwànyine kwikala mukenji to. Kabèèna mwà kwenza kantu nànsha kàmwè pa bwalu abu to; kakwèna cibawu to. Kùdi cibawu bwà dishipa dyà mikenji yà Nzambì, nènku, neciikalè, newikalè nè cyà kufuta too nè ku dyeyà dyà ndekeelu kumpàlà kwà wèwè kupàtudiibwa.

⁴⁵ Mpindyewu bantu bààbùngì leelù ewu bàdi bènza cilèmà cyà cyèna luse aci ànu mwàkenzà mulùmyànà ewu amu, pàakadibàndishàye, kulwayè munène, kudyùmwayè nè ùvwa nè bintu byònsò mu byanza byèndè, kudyùmwayè mu dikùbiibwa nè: “Nzambì mmunnangè bikolè, mu mùshindù wà nè kakwèna cintu nànsha cimwè cidi mwà kuntàcisha mpindyewu to.” Pààkenzàye nànkù, wàkadyèla mu mùshindù wùmwèwùmwè wàkenzà Nebùkàndànèèsà musangu kampàndà awu, munùdì nwènù babadi bàà Bible bamanyè amu. Pashiishe tudi tusangana nè wàkatuuciibwa nè nsudi bwalu wàkateeta kwangata kaaba kàà mwambi kampàndà.

⁴⁶ Ànu àbìdì àdì panshì aa, ntu ngaakula mu buloba bujimà bwà Beena Kantu-ku-byanza bàà Èvànjeeliyò mu Kaabujimà, kùkaadi cikondo kampàndà, mvwa musòmbe mu mwaba kampàndà, mùvwa mmu Jamaïque mwàmwa, tuvwa twenzamù disangisha kampàndà.

⁴⁷ Ndi mubànangè, bwalu mbantu bàdi bàfùmina mu èkèleeziyà yònsò. Bidi bimpèèsha mpùngà bwà—bwà kwakula. Míngà misangu èkèleeziyà kayìtu yìkwàcishangana mu mudimu to, kàdi beena kantu-ku-byanza bààbò bàdi bàkwàcishangana mu mudimu, bóbò—bóbò’s nebenzè bu bàdi bìmanyinakù beena kantu ku byanza.

⁴⁸ Pa nànkù mpindyewu tudi tusangana nè, mwòmò amu, mvwa ngènzà disangisha. Dilòlòlò adi patwàkalukilà ku Cilààla-beenyi cyà Flamingo aci, Mémè nè: “S’ndi nè bundù bwènù nwènù balùmyànà.” Mémè nè: “Mbyà bundù be. Byònsò binùdì nwakula abi, kumpàlà kwà balombodi bònsò bàà cidiidi nè bikwàbò, nè dibanda-dipweka dyà beena kantu-ku-byanza munwemu emu, bìvwa bwà nè: ‘Mvwa nè kaamushinga kakesè mùnwemu emu, nè ndi mupetè màshinyi à Cadillacs dikùmi nè àsambòmbò,’ anyi ní ncinyi cikwàbò.” Mémè nè: “Bantu abu, kanwèna mwà kudipàlakaja naabò to.”

⁴⁹ Ke lutàtù lùdì naalù èkèleeziyà leelù ewu ndwòlò alu, nudi nuteeta bwà kudipàlakaja nè Hollywood. Nudi nuteeta kumuvwija bu Hollywood. Vùlukàayi nè, Hollywood ùtu ùbàlakana; Èvànjeeliyò ùdi wèla nsèsè. Kwèna mwà kuya mu buloba bwàbò to; bikèngela ùbàtwalè mu buloba bwètù. Ke mwaba wùdì wùkèngela bwà twètù kubàfikisha awu’s.

Bikèngela kubàfikisha kaaba aka, kî ntwètù tuya kuntwaku to. Katwènakù mwà kudipàlakajakù naabò to. Katwèna baswè kudipàlakaja to. Bàdi bàkenka nè bàbàlakana; Èvànjeeliyò ùdi wèla nsèsè nè kalolo nè didipwekesha. Aci's ke dishiilangana pankaci pàa dyela dyà nsèsè nè dibàlakana.

⁵⁰ Mpindyewu tudi tusangana nè, ngákambila bantu aba, mémè nè: “Bwalu bùdiku mbwà nè, nwènù bàdi ànu beena kantu-ku-byanza aba, nudi nuteeta kuyiisha Èvànjeeliyò. Kanwènamù nè cyà dyenza to. Twètù bayiishi bitu bitùkolèlè ànu menemene bwà kumulama mululàme. Nènku nwènù bakwètù kanùvwa nè cyà kwikala nwenza nànkù to. Nudi nuteeta kwangata kaaba kabì. Nudi beena kantu-ku-byanza, kàdi kanùteeci kwangata kaaba kàà Èvànjeeliyò to.”

⁵¹ Ke mémè—mémè kwamba nè: “Bwalu budi nè, leelù ewu, nwènù nudi nuteeta bwà kwamba búngì bwà binùdì naabi. Ndishiilangana kaayi nè beena Mpenta bàà kumpàlà's! Beena Mpenta bàà kumpàlà bàvwa batàpùlùke nè bìvwàbo naabi.”

⁵² Mwimbi mukèsè kampàndà wa misambu, ùvwa muntu mukèsè mwímpè. Ndi mumunangè. Yèyè ùvwa muntu mwímpè, kàdi wákamba nè: “Mwanèètù Branham, kacya ncitukù muswè kwela díyì dyèbè mpatà to, anyì kwamba cintu nànsha cimwè cyà cibèngangana naaDì to.”

⁵³ Mémè nè: “Abi's mbímpè. Cyòci kaciyi Díyì dyà Mukalenge to, dibà adi udi nè bukenji bwà kubenga, mwanèètù.”

Ke yèyè nè: “Aci's ke musangu wùmwè wùdi mupùile.”

⁵⁴ Mémè nè: “Kaa, to. To, to.” Mémè nè: “Beena Mpenta bàà kumpàla bààkasumbisha byònsò bìvwàbo naabi, nè kubyèlabò mu midimu yà bwambi, nè—nè kupàtukabò.”

⁵⁵ Muiishi kampàndà kuntwaku, wákamba nè: “Aci's ke cìvwa cintu cibyacyiyàlà citùbo kacya benzè.”

Mémè nè: “Cinyi aci? Nyumà Mwímpè wènza cilèma anyi?”

⁵⁶ Yèyè nè: “Ncyèna ngàmba aci to; kàdi cìvwa cintu cibyacyiyàlà citùbo kacya benzè.” Yèyè nè: “Dibà adi pàakabwelà dikòkangana mu èkèleeziyà, kabàvwa nè nzùbu yà kuyakù to.”

⁵⁷ Mémè nè: “Ànu menemene kabingilà kàakabàsàkila Nzambi ku disumbishabò nzùbù yàbò, pashiishe bàakaya myaba yònsò, bàtangalaja mukenji mu ditùnga dijimà. Kabàvwa nè mwaba mukwàbò wà kuya to.” Nzambi mmumanyè cidìYe munkaci mwà kwenza, mulekèlaaYi ànu àlombolè Mudimu.

⁵⁸ Tudi tujandula nè muntu ewu wákangata mbàbùlà, kubwelayè bwà—bwà—bwà kwenza di—dimukùpa, mbà—mbà—mbàbùlà, kwosha mánànshi. Aci kacìvwa mudimu wèndè to. Yèyè ùvwa mfùmù, kàvwa mwà kwikala mwakwidi to. Ke mwakwidi kulwayè lùbilu paanyimà pèndè, nè kumwambila, wàmba nè: “Kùvwa nè cyà kwenza cintu eci to. Ànu mwena

Lewi ke udi mwà kwenza ciinè aci, kàdi wêwè kwêna mwena Lewi to. Bidi bikèngela muntu mudilàmbùle bwà cyôci aci, kàdi wêwè kwêna mulàmbula kùdi Mukalenge to. Wêwè udi mfùmù. Nzambi ùdi ùkubènesha. Abi's mbîmpè. Kàdi kwêna mulàmbùdiibwe bwà kwenza nànkù to.”

⁵⁹ Misangu yàbûngì tukààdikù bamòne mapà àteeta kutentudiibwa, pàvwàbo kabàyi balongolwela dibìikila adi to. Nè tudi bamòne byònsò ebi. Tudi tucimòna leelù ewu ànu mwàkadibi musangu awu, tumòna muntu kampàndà ùteeta kutentula muntu mwikàle nè Nyumà Mwîmpè; bèèla mbilà bu bôbò, bàakula mu myakulu bu bôbò, kàdi kabàyi ànu bamanyè byàbûngì bwà bwalu bwà Nzambi to ànu mùdi Hottentot kàyi mufwànyine kumanya mwanu wà beena Èjiiipitù wà mafùku cinunu nè bùmwe awu to. Ncyà bushùwà, ànu ditentula, wenza maalu mùshindù awu, bàdìvwàdika cintu kampàndà.

⁶⁰ Kàdi lekèlaayi nnwàmbilèku, nwènù bàdi bacitàngile abu, vùlukàayi nè, mwaba wunùdi numòna muntu kampàndà ùcitentula, kùdi cintu kampàndà cishùwashùwàlè mwaba kampàndà. Mèmè mupetè ndola kampàndà, mwikàle wa mafi, cidi ànu cimanyinu cyà nè ùvwa mutentwila pa wa cyà bushùwà.

⁶¹ Kàdi tudi tusangana muntu ewu, Uzìyà, ùteeta kwangata kaaba kàa mwakwidi ewu. Nènku pàakamulondàbo munyimà, bàmwambila, wàkafùka cijji. Yèyè kukudimuka kàdi kubamanyisha nè: “Nèngènzè cìndi muswè kwenza aci. Nwènù nudi banganyi bwà kungambila cyà mèmè kwenza? Nwènù nungambila cyà mèmè kwenza? Ndi mfùmù, nengenzè cìndi muswè bwà kwenza's!” Kàdi Nzambi kumutuuta nsudì, ànu mwaba awu mene. Nènku wàkafwà, mwena nsudì. Mu cijji cyèndè, pàakabinduluka cijji cyèndè, dîbà adi wàkatuuciibwa nè nsudì.

⁶² Pashìishe cìvwa dìleesònà kùdi mupròfetà wa citende awu, bushùwà menemene. Paanyimà pàa yèyè mumanè kutàngila muntu ewu ùjuuka, nè ùpeta dipòlomè dyèndè dyà Ph. D., dyèndè dyà LL.D., nè bikwàbò, nè pashìishe ùteeta bwà kwangata kaaba kàvwà kakàyi kèndè to. Wàkasangana nè, nè kuumvwayè cijji bwà bwalu abu. Pàakateetà muntu bwà kumwambila cìvwa EMU MMÙDÌ MUKALENGÈ WÀMBA, wàkapanga kucijingulula. Ke Nzambi kumutuuta nsudì, cidi ciikàle cìfwànyikijilu cyà mpèkaatù. Èyo, ku cyôci eci, Yeshàayi wàkayiiila nè Nzambi ùdi ùtèeka muntu Wendè pa kaaba kèndè. Nzambi ngudi wenza ditèeka mu mudimu adi awu. Katwèna mwà kwangata muntu mîngà misangu kàdi kumwenzela cikampàndà eci to.

⁶³ Inàbànzà mutekète, mwab'ewu ànu àbìdi àdi panshì aa, kungambilayè nè ùvwa...anyì ùvwa nè mwànà mukèsè wa balùme uvwayè nè cyà... Yèyè nè: “Wàkadyùm vwa nè ùvwa nè dibìikila.” Ùvwa nè bidimu bitwè ku makùmi àsàtù nè bitaanu,

ngèèla meeji. Yêyè nè: “Mwanàanyì wa balùme, wa bidimu bitwè ku dikùmi nè binaayi, ùdi ùmvwa nè ùdi nè dibìikila. Mwanèètù Branham, udikù mwà kumutùma bwà kupetayè dipòlomè dyà Ph.D., anyi cintu kampàndà cikwàbò cyà mùshindù awu, kumutùma ku cilongelu citùmbùke kampàndà anyi? Ncinyi cyùdikù bwà kufila bu mubelu?”

⁶⁴ Mémè nè: “Citámbe bwímpè cìndì mumanyè ncilongelu cyà kuya ku binù, kutwà binù byèndè panshi.” Mémè nè: “Yêyè’s mmufwànyìne kupàtuka munkaci mwà cyòci aci, nènku, katanci aka anyi, mmubangè kuyiila ma-...makùmi nè byònsò pa *cikampàndà*, nè kàbìdì pa *cikansanga*, nè kumwelabo diteeta dyà mutù nè Cipidi cyà Dimanya, nè byònsò byà mùshindù ewu abi. Nè pashiishe byònsò byà kùdi Nzambi, bìvwàku munda mwèndè abi, bàdi bàbìpàtula,” Mmungàkambà. Kì mbwà kupwekesha bintu abi milongo to, kàdi ndi ànu munkaci mwà kunùleeja mùshindù wùdìbo bàtàmba kupàtuka mu mulongo.

⁶⁵ Tàngilàayi numòne cidì, eci cyenzèke. Mpindyewu, Nzambi ùdi ùtèèka muntu Wèndè pa kaaba kèndè.

⁶⁶ Ànu àbìdì àdì panshi aa, mvwa mbala kaabwalu-kalonda kakesè mwaba ùvwà mu—mukàji kampàndà uvwa...mupete disaama kampàndà—kampàndà, dyà—dyà—dyà—bisùlùsulu bìaama, mu St. Louis, mu Missouri. Nè yêyè ùvwa ùsaama bikolè, bikolè be, ke kwambabò nè ùvwa nè cyà—cyà—cyà kufwà. Nènku ùvwa nè mwànà wa balùme mu cilongelu citùmbùke. Ki kufikabò ku dijandula nè, ngàngàbukà ngwàkajandula awu, ànu ntàntà uvwayè wèla meeji nè nguvwayè nendè, bwà kwikala nè mwoyi. Ke yêyè nè: “Pàmwàpa kààkwikala kàbìdì mwab’ewu ditùkù dìmwè anyi àbìdì, makwàbò to.”

⁶⁷ Ki kwelabò nsongàalùmè awu nshinga, bwà “kwenzayè nè mwèndè mwònsò bwà kulwa kumbèlu,” mamwèndè ùvwa ùsaama bikolè. Pa nànu nsongàalùmè wa citende awu, munkaci mwà kupeta dibìikila dyà ku nshinga, ùvwa ùdìlongolola bwà kuyayè, kàdi è kupetayè dibìikila dikwàbò dyà ku nshinga nè: “Mamwèbè ùdikù bímpè mpindyewu, èyo. Kùlù to.”

⁶⁸ Èè, pashiishe bu cidimu cijimà nànu awu, mòna’s, nsongàalùmè awu kwenzayè dikùmbula dyèndè dyà ku cidimu kwàbò. Pààkaalukilàyè kumbèlu, kwambayè nè: “Maamù!” Paanyimà pàà yêyè mumanè kumwela mwoyi, kwambayè nè: “Udi mumanyè’s, ndi ànu ndikonka’s, paùvwà usaama bikolè, kùtukù ànu kacya mungambìle menemene cìvwà cyenzèke to.”

⁶⁹ Yêyè nè: “Kaa, mwanàanyì, ndi nè bwalu bwà kukwambila.” Yêyè nè: “Udi mumanyè kaacitanda kakesè kàdi kwìnshì kwà mùsèèsù eku aku, kwìnshì eku kùtù bantu àbu bèèla mikunda mùshindù awu, nè bèèla mbilà nè batùngùnùke anyi?”

Yêyè nè: “Èyowà’s.”

⁷⁰ Yêyè nè: “Mpaasàtà wabò ùdi wìtabuuja disambidila dyà babèèdi.” Yêyè nè: “Umwe wa ku bainàbànzà abu kulwayè

kungambila.” Yêyè nè: “Ngàngàbukà mmungambilè nè kùvwa kunshàadile matùkù àbìdì bwà mèmè kwikala pànu apa.” Yêyè nè: “Pashiishe ke kuyabò kabìikila, kuswàbo bwà mpaasàtà wabò kulwayè bwà kunsambidila, ke inàbànzà awu kwenzayè nànkù, ke mèmè nè: ‘Èè, bushùwà, lwàkù nendè kùnweku.’” Yêyè nè: “Udi mumanyè’s, yêyè awu wàkalwa,” yêyè nè, “kubalayè Mufundu kampàndà mu Bible amu.” Ke yêyè nè: “Yêyè kulwa kuntentekela byanza, nè kunsambidilayè. Nènku, nudì bamanyè’s, mubidi-kapyà awu kunguumukawù, nè mèmè kusàngala.” Ke yêyè nè: “Kaa, Nzambì àtumbè!”

Yêyè nè: “Mààmù, mààmù, mpindyewu’s udi mumanyè cìdì cìmpè kutàmba aci’s!”

⁷¹ Yêyè nè: “Kaa, kaa, to, to, munanga wanyì,” yêyè nè, “ncyà bushùwà nè ncyenzèke.” Yêyè nè: “Butùmbi kùdì Nzambì’s wè! Ndi nkwambila,” mwàkambàye.

⁷² Yêyè nè: “Mpindyewu udi bulelèlè wenza maalu bu bantu abu.” Yêyè nè: “Kwèna nè cyà kwenza nànkù to, maamù.”

⁷³ Yêyè nè: “Kàdì,” yêyè nè, “munanga wanyì, yêyè’s mmucibadile ànu mu Bible amu. Mmubadile mwaba awu, mu Maakò nshapità wa 16 nè: ‘Bimanyinu ebi nebifilè aba bàdì biitabuujà.’ S’kì cyòcì eci *Mwab’ewu* mene.” Yêyè nè: “Twètù, twètù. . . Ncyòcì eci *Mwab’ewu* mene,” mwàkambàye.

⁷⁴ “Kaa, mààmù, abu’s mbàdì kabàyi balongè kàlaasà bàdì kwìndì kwàka.” Yêyè nè: “Bantu bàdì kuntu kwàka abu kì mbalongè kàlaasà to.” Yêyè nè: “Bàdì ànu bantu bapèlè bèètù aba, bisòtà ànu mùdì byà mu mùsèsèsù, nè bikwàbò, nè ukabwela mwinè amu.” Yêyè nè: “Mpaasàtà awu. . .” Yêyè nè: “Tudi tuyiila mu cilongelu citùmbùke, nè Maakò 16, kubangila ku mvnsà wa 9, kì mmusonsòdìibwe to.”

Yêyè nè: “Butùmbi kùdì Nzambì’s wè!”

Yêyè nè: “Mààmù, mbwalu kaayi ebu neebè?”

⁷⁵ Yêyè nè: “Mvwa ànu munkaci mwà kwela meeji’s, mwanaànyì wa balùme, piikalà Nzambì mwà kungondopa nè Diyì kadiyì disonsola, ciwàYe mufwànyine kwenza menemene nè didì disonsola adi ncyinyì?” Pa nànkù ndi ngèèla meeji nè aci ncikòse bwalu’s. Kì mmwòmò anyì? “Piikalà didì kadiyì disonsola mwà kwondopa, ncyinyì cyènzà didì disonsola?” Ke cyòcì aci’s, nwènù balundà bàanyì. Eyowà’s, Mukalenge.

⁷⁶ Mpindyewu, ùteeta bwà kwangata kaaba kàà mukwàbò. Nzambì ùdì ùtèeka muntu Wendè pa kaaba. Nzambì ùdì ùtèeka muntu Wendè pa kaaba. Kèna nè cyà kuteeta kwangata kaaba kàà mukwàbò to. Kwèna nè cyà kwenza nànkù to.

⁷⁷ Mpindyewu cikèenà-kumòna ku ntempèlù. Ku ntempèlù, yêyè wàkapweka pàakajandulàye cyòcì aci apu. Yeshàayì wàkamòna aci, Hezèkiyà, cyàkamwenzekelà, nè pashiishe wàkafwà nè kùvwa ci—ci. . . Ndi nswa kwamba nè Uzìyà, nè yêyè

ùvwa—yèyè ùvwa muumùshìibwe bayè nendà ku citùùdilu cyà beena nsudi, nè mwanèndè wa balùme ùvwa nè cyà kukòòkesha pa kaaba kèndè. Ke díbà adi Yeshààyi kwenzayè bu uvwa maalu mamutondè, ke pa nàнку kuyayè ku ntempèlù ditùkù kampàndà, bwà kwenza bu udi udyùmushakù bujitu abu—abu.

⁷⁸ Ndi ngèèla meeji nè aci ncintu cìmpè cyà twètù bònsò kwenza, ncyà kupweka ku nzùbu wa Nzambi, kupweka nè kwikishishakù musùùkà wèbè, kuumushakù cintu aci mu meeji èbè.

⁷⁹ Pa nàнку Yeshààyi wàkaya kuntwaku nè wàkaditwa mu disambila. Yèyè kèna. . . Ncifwànyine kwikala mu mapingaja amu, nènku yèyè. . . anyi pa bwebwebwe mu dindà, ncyèna mumanyè to. Pa nàнку kupwekayè ku cyoshelu nè kubangayè kusambila, nè kuditwayè mu disambila too nè mwà kabwelàye mu ndòndò wa meeji matòòke. Mpindyewu ke mùshindù ngwówò awu. Yèyè ùkaavwa mumòne cìvwayè ùtàngila aci, pa buloba apa, cìvwa cipangile. Mfùmù uvwa Nzambi mubènèshe awu, mfùmù munène, wa bukolè ewu, mutàmbe bukolè mu ditùnga amu, kàdi nànsha nàнку ùvwa mupangile. Nè pashìishe kàvwa mumanyè cyà dyanza to, ke kuditwayè mu disambila.

⁸⁰ Pashìishe, dyàkàmwè, kubàndishayè mutù wèndè, nè díbà adi kumònayè Mfùmù mulelèlè. Wàkamòna Nzambi mubàndishìibwe muulu mu Dyulu; musùmbà Wèndè wàkuuja Maulu. Wàkamòna, wàkamòna cintu kampàndà cyà kutàngila, cileejilu cilelèlè. Paùdi utàngila nè uteeta kuvwija muntu kampàndà cileejilu cyèbè, ncyà bushùwà nè neùlalukè, bwalu yèyè neàpangilè. Kàdi Yèyè ùvwa ùteeta kwambila mupròfetà nè: “Kùtàngidi muntu anyi cidì muntu wàmba to. Kùdimunà mèsù èbè kùNdì nè ku cìNdì ngàmba. Tàngilà kuulu Eku; kí nkwaswa wa butùmbi wa pa buloba to, kàdi Nkwaswa wa butùmbi wa mu dyulu, mubàndishìibwe too nè mu Maulu,” nè cizemba cyà mùzàbi Wèndè cyuje maulu. Ke kutàngilayè muulu. Nè pashìishe kutàngilayè mu ntempèlù, ku ntempèlù kumònayè Nzambi mubàndishìibwe, nè kumònayè Baselèfimà bàà mu Dyulu.

⁸¹ Mpindyewu, Baselèfimà abu kí m’Banjèlò to. Bàdi nè cyà kwikala bwoshi bàà mulàmbù bàvwà bààkwila bantu bwà dipiila. Nè Bòbò abu bàvwà bwoshi bàà mulàmbù.

⁸² Cibwikilu cyà pabwàcì cìvwa pamutù pàà Bifùkùibwà ebi, nè bileeja nè Nzambi ngwa cijila yònsò. Nzambi ngwa cijila yònsò. Nènku Bàvwà bèèla mbilà mikolè nè díyi Dyàbò ditwè nè: “Wa cijila, wa cijila, wa cijila, m’Mukalenge Nzambi wa Bukolè bwònsò. Wa cijila, wa cijila, wa cijila,” ànu mu Bwikadi bwà Nzambi mene.

⁸³ Vùlukààyi nè, bàvwà m’Baselèfimà nè Bakèlùbà bàvwà bàlama Mwaba wà Cijila abu. Mbòbò Abu bàdi bàngata mulàmbù nè bàwùlambula. Kàdi’s ke bòbò aba, biikàle nè mwoyi

ànu mu Bwikadi bwà Nzambì mene, bèèla mbilà nè: “Wa cijila, wa cijila, wa cijila, m’Mukalenge Nzambì wa Bukolè bwònsò.”

⁸⁴ Tùtangilàayi lwidì lwàbò bwà katanci kakesè. Tudi tujandula nè ebi bivwa Bifùkiibwà byà mapwàpwa àsambòmbò. Bàvwa nè mapwàpwa àbìdì mabwikile kwísù, nè mapwàpwa àbìdì mabwikile makàsà Ààbò, nè biikàle bàbùuka nè mapwàpwa àbìdì.

⁸⁵ Anji elàayibi meeji, mapwàpwa àbìdì mabwikile kwísù Kwàbò, dyàmbedi. Dyàmbedi, necìikalè cinyi? Tùjandulàayi cìvwà mapwàpwa àbìdì àvwà mabwikile kwísù Kwàbò awu wùmvwija. Pàdìbi nè Nzambì ngwa cijila mu mùshindù wà nè nànsha Banjèlò bàà cijila nè Bakèlùbà bàdi nè cyà kubwikila mpàla Yàbò, bwà kwimana mu Bwikadi Bwèndè, mmunyi mutwìmanà twètù? Pàdìbi nè bwà kwimana, bikèngela bwà twètù bònsò kwimana, mu Bwikadi bwà Nzambì; Yéyè ke Mulumbulwishi wa kumutù kwà bònsò, nè twètù bònsò netwìmanè mu Bwikadi Bwèndè. Nè Banjèlò bàà cijila bàvwa kacya kabàyìku bamanyè nè mpèkaatù ncinyi to; Bàvwa bafùkiibwe Bifùkiibwà byà pabwàbì, kàdi bwà kwimana mu Bwikadi Bwèndè, bikèngela bàbwikilè mpàlà Yàbò yà cijila ayi, bwà kushàalamù. Piikalàbi bikèngela bwà Banjèlò bàbwikilè mpàlà Yàbò yà cijila, bwà kwimana mwaba awu, netwènzè cinyi, bwà kwikala nè mwoyi mu Bwikadi bwà Nzambì wa Bukolè bwònsò, twètù bashàale mu Bwikadi Bwèndè? Tudi nè cibwikilu, nànsha nànkù, Mashi à Yesù Kilistò. Ncyà bushùwà. Leelù ewu. . .

⁸⁶ Aci’s ki kaneemu kààbùngì. Aci cìvwà cyùmvwija nè kaneemu kààbùngì, mu Bwikadi bwà Nzambì.

⁸⁷ Leelù ewu kakwèna kaneemu kààbùngì to. Kaa, bukesè bùdiku abu, kàdikù ànu kakesè menemene. Cinyi? Nudi numòna bantu bàseka cidìbo bàbùikila nè mbwena Kilistò. Cìikalà mwà kwenzekela muntu awu ncinyi? Pàdi Nzambì ùtùma cintu kampàndà pa buloba, nè bòbò bàcimòna cikwàta mudimu ànu menemene nè Dìyì, nè pashìishe muntu wàkula bwà cyòci aci, nè ùciseka? Nudi bamanyè cidi Bible mwàmbè anyi? Yesù wàkamba nè: “Aci ndipenda, dyà Nyumà Mwimpè, nè kacya kufwidiibwakù luse to.”

“Kaa,” mùdìbo bàmba, “Abi mbyà dyabùlù.”

⁸⁸ Wàmanya nè byùdi wamba, mwanèètù wa balùme, mwanèètù wa bakàjì. Wàmanya nè byùdi wamba, wèwè ngènzàmpèkààtù. Kakwènakù difwidiibwa dyà luse bwà bwalu abu to. Yesù wàkamba nè: “Kwakula dìyì dibi bwà Dyòdi adi, kabìvwa bifwànyine kufwidiibwa luse mu eci cikondo anyi mu cikondo cìcilwalwà to.”

⁸⁹ Tàngilàayi cìvwà Yè ùfùme ku dyenza, ùjingulula, ùbàmbila meeji àvwà mu mwoyi wàbò. Ke kwambabò nè: “Yéyè’s

m'Beelèzèbùlà,” bàbiikila Nyumà wa Nzambì nè “nyumà wa bukooyà, démon wènza cyenzi cyà Nzambì.”

⁹⁰ Ke Yéyè nè: “Nénnùfwilè luse,” difuta dyà cibawu kadivwa dyenjibwe mu cikondo aci to, kàdi, nè Yesù kàvwa mufwè to. “Kàdi,” yéyè nè: “pààlwà Nyumà Mwímpè, kwakula bibi bwà Cyôci aci, kacyakunùfwidiibwakù luse to.” Pààlwà Nyumà Mwímpè bwà kwenza cyenzi cimwècimwè civwàYe wènza musangu awu aci, kacivwakù mwà kufwidiibwa luse to. Bantu bapangè kaneemu's! Citùdi mwà kutèkemenà ncinyi pa kuumusha cilumbulwidi, ditunga edi didi dibènge Nzambì?

⁹¹ Ditunga edi, nànsha mùdi ba-Billy Grahams nè ba-Oral Robertses búngi cyanààna beelè mbilà bènda kàkosolola ditunga edi, nè màsàlaayi makwàbò manène à ku Nkùrusè àvwà mayè mu ditunga dijimà edi awu, miikàle àyiisha Èvànjeeliyò, kàdi ùdi wènda ùbùtula cidimu cyònsò eci, mpèkaatù ùdi ànu munkaci mwà kuvulangana.

⁹² Ùvwa mmu—mmutangadiki munène awu, Billy Graham, wakamba ditùkù adi mu òmwè dyà ku masangisha èndè awu, pàakayàye ku New York, wàkamba nè ùvwa mwitabùùje nè “New York ùvwa muvulàngàne byà pa lukàmà byàbúngi, mu mpèkaatù, kacya ànu ku ditàbuluja dyèndè kwàka.” Kwambayè pàvwàye munwemu mu Californie emu, mu Los Angeles, kwambayè nè: “Mu bidimu dikùmi anyi dikùmi nè bitaanu kuumukila ku mpindyewu, nè mwena mwàbò yònsò neikalè nè cyà kwambula cingoma, anyi cintu kampàndà bwà kudikùba, kabèena mwà kupeta bampùlùshì búngi bukùmbàne to, mpèkaatù mmujuukile kuulu mu mùshindù wà dikèma.”

⁹³ Kaa, ncinyi aci? S'ndibùlà dyà kaneemu kùdi Bible. Mbadyombòle mpungà wabò. Mbapendè Nzambì nè bamwelùlwile. Ncyà bushùwà.

⁹⁴ Mpindyewu tùcitwàlaayi pabwipi ndambù nè kwètù kumbèlu, tàngilàayi màkèleeziyà, cidiwu mènze's. Bàbúngi bààkùdibò paùdi ukòsolola ditunga... Paùdi upeta muntu mwikàle nè búngi bukùmbàne bwà—nè búngi bukùmbàne bwà bukolè bulelèlà bwà Nzambì mu yéyè, bwà kwambila bantu bwà njila yàbò yà mpèkaatù! Bàpeta muntu kampàndà udi mwà kubàmbila nè bàvwa nè cyà kulediibwa cyàkàbidi, kabiyi dilabulangana dyà ku byanza anyi kubànda kwangata dipàngadika to. Bikèngela bàlediibwè cyàkàbidi; kí nkufùnda dìna dyèbè mu mukàndà kampàndà, anyi kukashàala wa mu èkèleeziyà kampàndà, anyi kulabulangana ku cyanza, anyi dimyaminangana kampàndà dyà màyi, anyi dibàtiiza kampàndà to. Kàdi kwikala mulediibwe kùdi Nyumà wa Nzambì, mutàpùlùke, Mwoyi wà Nzambì musòmbèle munda mwèbè, ùDileeja wòwò mwinè patòòke; kí ng' ànu leelù, nè màalabà to, kàdi matùkù èbè ónsò à mwoyi; nè disànka mu mateeciibwa èbè nè makèngeshiibwa èbè, udi mufwànyine

kutùngunuka, mumanyè nè njila mmukàngula kumpàlà kwèbè, bwà kuya mu Butumbi. Ke mùshindù wà Èvànjeeliyò ng'wówò awu's! Paùdì ubàsangana mùshindù awu, udi uMuyiisha; kàdi walukila cidimu cìdì cilondà, kí bôbò abu ànu mwomùmwe, cintu cimwècimwè aci, cikòlà citàmbe bubì, nè citàmbidile ànu kutàmbidila. Paùdì ànu utàmba kuyiisha ucilwisha, kàdi's ke kutàmbaci kubìipa. Ncinyi aci? Ndiipanga dyà kaneemu kààbùngì.

⁹⁵ Nè pashìishe byà pa lukàmà makumi citèemà nè bitaanu byà bantu abu bàyaayà mu èkèleeziyà, bàdì nè dìnà dyàbò mu mukàndà, bàmba mùdìbò beena Kilistò. Muntu wàmba mùdiye mwena Kilistò, ùnwa mfwankà, nè ùnwa maalà, nè ùnàya twartà twà mfrangà, nè wènza minèkù yà bundù. Balami bààbùngì mu kasùmbù aku, biikàlè nè bakàjì umwe, bàbìdì, nè bàsàtù, nè bànaayi. Aci's ncilelèlè. Bundù kaayi's wè! Bakàjì bìmba mu kòralè, nè nsukì mibebula. Bible mmwàmbè nè: “Yèyè mmuntu wa ùfwìshangana bundù.” Bilaabu kwìsù! Kùvwa mukàjì ànu umwèpelè wàkadilaaba bilaabu kwìsù, mu Bible, ùvwa ny'Izàbelà awu. Nzambi wàkamudiisha kùdì mbwa, pa nàнку nudi numòna cìdìYe wèla meeji pa bwalu abu's. Kàdi dìbà adi udi ulwa kubàmbila bwà cyòci aci; cidimu cyàlondà, walukila, ubàsangana batàmbe kubìipa kupita dyàmbedì. Babùle kaneemu, kabèèna nè kaneemu to, kakwèna—kakwèna meeji à nsòmbelu wa kaneemu to.

⁹⁶ Lekèlaayi nwwàmbilèku cintu kampàndà, nwènù bakàjì, bansongàakàjì, nè banunu, kàbìdì's; bàdì bàpàtuka pambèlu apa nè nkanzu eyi pambidi, tulàmbà etu twà kale tubàkwàte ncyoncyoncyo, nè tùpùtulù. Wèwè udi wamba nè: “Kabìvwa bikèngela bwà wèwè kwakula mùshindù awu to, Mwanèètù Branham.” Bivwa bikèngela mèmè kwenza nàнку. Awu's mmudimu wànyì. Eci's—eci's cyambilu.

⁹⁷ Muntu kampàndà ùvwa mumbiikile, àbìdì àdì panshì aa, umwe wa ku batangadiki bàà batàmbe bunène bàà beena Mpenta bàà mu ditùnga emu. Yèyè nè: “Lekèlà bantu abu kwà tàlàlàà.”

Mèmè nè: “Wèwè udi nganyì bwà kungambila bwà kubàlekela kwà tàlàlàà?”

⁹⁸ Yèyè nè: “Ndi mukunangè.” Ke yèyè nè: “Mudimu wèbè wà bwambi ngwà kusambidila babèèdì.”

Mèmè nè: “Nkuyiisha kwà Èvànjeeliyò, mwanèètù.”

⁹⁹ Ke yèyè nè: “Tàngilà, Mwanèètù Branham,” yèyè nè, “mòna's, bantu abu's bàdì bìitabuuja nè wèwè udi mupròfetà.”

Mèmè nè: “Kacya ncitukù mwàmbè nè ke cìndì to, kí mmwòmò anyì?”

¹⁰⁰ Yèyè nè: “Kàdi's bàdì bìitabuuja nè ncyùdì. Bwà cinyì kùyikù ulongesha bakàjì abu mwà kupeta Nyumà Mwímpè, nè mwà

kupeta mapà nè kwenza cintu kampàndà, pamutù pàà misangu yònsò kubàtànisha bwà mùshindù wùdibò nè cyà kulwàta nè bìdìbò munkaci mwà kwenza? Bwà cinyi kùyikù ubàlongesha bintu byà mùshindù awu, bwà kubàkwàcisha?”

¹⁰¹ Mémè nè: “Mmunyi mündi mwà kubàlongesha makùmi makolè pàdìbò kabàyi nànsha baswè kuyiila ABC?” Nudi bamanyè cidì ABC anyi? Misangu yònsò kwitàbùùjà ànu Kilistò. Ncyà bushùwà.

¹⁰² Mpindyewu, mpindyewu mmunyi mùdi mwà kucyènza, mmunyi mùdi mwà kucyènza? Mbimwèke ànu bu nè kùdi dicìncimikiibwa kùdìbò, cintu kampàndà kî nciswè kubàlekela bàcyènza to. Cidi cìcìwija Sodomà wa cyena leelù. Ke dìbà ditùdi tusanganyiibwamù adi, bintu byà byènza bwòwà bìdi munkaci mwà kwenzeka mu ditunga leelù ewu ebi.

Ke yèyè nè: “Èè, tàngilà . . .”

¹⁰³ Mémè nè: “To, ncyèna nè ndongamu yà kutùdila mfrangà to. Ncyèna nè èkéleziyà wa kungiipata to. To, mukalenge.” Ke mémè kwamba . . .

Yèyè nè: “Awu’s mmudimu wà mpaasàtà, bwà kwenza nànkù.”

Mémè nè: “Kàdi bóbò kabèena bàwènza to.”

¹⁰⁴ Dìbà adi, aci nciàngìle muntu kampàndà, bìkèngela diyi kampàndà dyèlè mbilà bwà kucilwisha, bwalu ncibi. Ncyà bushùwà nè mbibi. Kaneemu kààbùngì, kuCineemeka.

¹⁰⁵ Nsongàakàji kampàndà wa citende wàkangambila musangu kampàndà, wamba nè: “Mukalenge Branham, kabàcyèna benza bilàmbà bikwàbò to ànu ebi’s.”

¹⁰⁶ Mémè nè: “Bàcidi ànu basùmbisha bilàmbà bijimà, nè bàdi nè màshinyi à bilàmbà.” Ncyà bushùwà.

¹⁰⁷ Lekèlè nkwambilèku cintu kampàndà, inàbànza. Wèwè’s udi mufwànyine kwikala ànu mukezùke nè mudilamè nè mwèbè mwònsò. Udi mufwànyine kwikala wakuneemekiibwa kùdi bàyeebè, mulundà webè wa balùme, nè mwèbè mwònsò. Kàdi dimwè dyà ku matùkù àdì panshi aa, ku Cibàsà cyà Cilumbulwidi, neulumbululè bwà dyenda dyà masandi.

“Mémè nciyi mupìile anyi?”

¹⁰⁸ Udi mupìile’s! Yesù wàkamba nè: “Ewu yònsò ukàtàngidi mukàji, bwà kumwalakana mmumane kwenda nendè masandi munda mwà mwoyi wèndè.” Nènku pàdi ngènzàmpèkààtù uvwa mukutàngìle mùshindù awu awu, nè mwikàle mukwelèle meeji awu, nebikengelè bwà kulumbululayè, mu Ditùkù dyà Cilumbulwidi. Kàdi wàkacyènza bwà cinyi? Wèwè ngwakadileeja kùdiye, wenda unyòndakaja nyimà mu bilàmbà byà mùshindù kampàndà nè bintu byà mùshindù awu. Cyà bushùwà. Bidi bundù. Neücyènzè, inàbànza.

109 Kàdi nwênù balùmè bàdi nudibìikila munùdi beena Kilistò, bàvwà nè cyà kukòokeshà nzùbu wenù abu, kàdi nulekela bakàji bèènù bènza cyôci aci, nyingàlalaayi cyanààna nzùbu wenù mujimà awu neàbutukè!

110 Nudi bafwànyine kubenga kunnanga paanyimà pàa cyôci eci, kàdi nènswambilè Bulelèlè, bwalu byanza byànyì—byànyì kabyàkwikala nè mashi pàngààfikà ku Cibàsà cyà Cilumbulwidi to. Aci's ke cintu cimwèpelè cyà bushùwà, nwamònu's. Èyowà's. Tèeleja, mwanètùtù, kùdi misangu yònsò ànu díyi dìdì díya nè cimanyinu, nudi bamanyè's, nè mbipicìibwe nè wèwè muDyùmvwè; kí ndyànyì mèmè to, kàdi Eci ncidi Bible mwâmbè. Ncyà bushùwà. Kaa, ndi mumanyè nè Cidi cyòmvwika cyà cyena kale, kàdi's aci ke cidi Bible mwâmbè, nè cyôci aci ke citùdì nè cyà kwikala.

Bikèngela bwà Banjèlò bàbwikilè mpalà yàbò, bwà kwimanabò mu Bwikadi bwà Nzambì.

111 Kàdi, nwênù bakàji, pàdi Bible mwâmbè nè: “Ncintu cidi kaciyi cikùmbànyine to, anyi cintu cyà ciibidilu eci, bwà mukàji kusambila mene nè nsukì yèndè mikòsa.” Kènà nè bukenji bwà kusambila to, kàdi nwênù nudi numutèeka mu kòralè kàbidi numuvwija too nè muiyishi. Ncyà bushùwà.

112 Ndi mumanyè nè aci cidi cìnusaamisha ndambù. Kàdi, nudi bamanyè's, ànu mùvwà mààmù nè ciibidilu cyà kungambila amu, bwà dinwà dya màfutà à mùdyàntondo nè: “Ówò kàyi makusaamìshe to, kaàkukukwàcisha to.” Pa nàнку ke mùshindù wùdìbi nè Èvànjeeliyò. Bidi bikèngela bwà kukwelesha Yè meeji. M'Bulelèlè. Balùme nè bakàji, bùbidi bwàbò, bónsò mbapiile, nseke yònsò yìbidi, maanyì mu nkùnde nkùnde mu maanyì.

113 Ke mwaba menemene wutùdi biimànyine, kakùyì kaneemu kààbúngì, nànsha Díyi dyòdi dyàmba cinyi. “Èè, abi's mbìmpè. Mèmè ndi ngèèla meeji nè bìdi ànu bìmpè.” Nudi nudicinkila nè mbìmpè. Bible mmwâmbè nè mbibi! Nè *kucinkila* mbwena kwamba nè “nkudyela mu bwalu bwà njiwu kakùyì bukòokeshi to.” Kwèna nè bukòokeshi bwà Nzambì bwà kwenza nàнку to.

114 Maasèminèrè aa nè bilongelu nè bikwàbò, bìdi bìpita bintu byà mùshindù awu ebi, s'mbundù. Cidi citèeka bansongàalùmè, bambi bàà bitende, mu njila mubi, ùbàngata bilondèshile tèòlòjí wa mùshindù kampàndà mukwàtakaja kùdi bantu pamutù pàa Díyi dya Nzambì. Kabyèna bikèmesha to mùdìbo kabàyi mwà kwitabuujà Mukenji mulelèlè wà cyà bushùwà ewu, kabyèna bikèmesha to mùdìbo kabàyi mwà kwikala nè Bintu ebi mu èkèleeziyà, kabyèna bikèmesha to mùdìbo nè cyà kuMwela pambèlu mu matùkù à ndekeelu, kakùyì kaneemu kààbúngì mu Bwikadi Bwèndè. Bwikadi bwèndè bùdi mwà kupweka, bàdi mwà kuseka nè kudyà bàzòkà, bènda banyunguluka bènza maalu à lukutukutu mùshindù wà kawùyì kumanya, kakùciyi kaneemu kààbúngì kàbidi to ànu mùdi cintu cyanààna amu,

mu Bwikadi Bwendè. Mpindyewu, mpindyewu kakùyi kaneemu kààbùngì to, nànsha kakesè, bwà Nzambi anyi cisàmbà Cyèndè.

115 Bwà cinyi, bwà cinyi bàdi bènza nùnkù's? Mpindyewu tèèlejàayi nè ntèmà. Bàdi bàcyènza bwà cinyi? Kí mbajingùlùle Bwikadi Bwendè to. Kabèèna bèèla meeji nè n'Nzambi to.

116 Nudi nwela meeji nè mukàji awu ùvwa mwà kwikala bulelèlè. . . anyi mùsàlaayi awu mwà kwikala muMutuutè dipi mu mpàla, nè ùvwa kwikala muMujìngìle mukùsu kwìsù nè kuMutuuta pa mutù, nè kwamba nè: "Mpindyewu Wèwè ní udi mupròfeta, twàmbilèbi nè wàKulengì awu nganyi"? Bu muntu awu mumanyè nè ùvwa n'Nzambi uvwayè ùtuuta awu, nudi nwela meeji nè ùvwa mwà kwikala mucyenzè anyi? Nudikù nwela meeji nè mùsàlaayi mukwàcike maalà awu ùvwa mufwànyine kuMutùùla mwedi ku mbàngà, nè kuMutwìla matè mwìsù, nè dikòkà dyà makòdi adi nè dièla mu mpàla, bu wikala mumanyè nè awu ùvwa mufwànyine kwikala Mwànà wa Nzambi anyi? Kàvwa mumanyè cyòci aci to.

117 Nènku leelù ewu, cidi bantu bàbùikila nè mmusumbà wà bakoleshi bàà maalù aci, kí mbamanyè nè aci n'Nyumà Mwimpè munkaci mwà kukwàta mudimu munda mwà bantu abu to. Nènku ànu bwà kwenza cintu kanà cyònsò eci; kùyi mucimanyè to, kùyi mumanyè Bwikadi Bwendè to. Nudi bamanye's, ànu mùdi kasùmwìnù kàà kale kàmba. . . Bàmwè bàà kùdìbo bàdi bàmba nè: "Ndi nya mu disangisha bwà kuseka, nyààya mu disangisha bwà kutùùla bilèma." Batu bambè nè bakùtàkàne batu benda nè bisàbaatà byà misonso muntàku mwaba wùdi Banjèlò bàciina bwà kudyata. Kabàyi bamanyè Nzambi to, ke kabingilà nkòkò aku.

118 Bwà cinyi kanùyikù bu Davìdi? Davìdi wàkamba nè: "Ntu misangu yònsò ànu mMutèèka kumpàlà kwànyì." Ke bwà cinyi yèyè wàkamba nè: "Ncyàkunyungishiibwakù to," bwalu Nzambi ùtu misangu yònsò ànu kumpàlà kwèndè. Èyowà's, mukalenge.

119 Mpindyewu, ciibìdi, Bàvwa babwikile makàsà Ààbò. Cìvwa "Bàvwa babwikile makàsà ààbò," aci cyùmvwija cinyi? Didìpwekesha. Babwikile kwìsù Kwàbò cìvwa cyùmvwija nè kaneemu kààbùngì mu Bwikadi bwà Nzambi, babwikile makàsà Ààbò cìvwa didìpwekesha mu Bwikadi Bwendè.

120 Ànu bu Mòsà mu Bwikadi Bwendè, ùvùùla bisàbaatà byèndè, ùbuulula makàsà èndè.

121 Pòlò pàakasanganàye Yesù, Dikunji dyà Kapyà, wàkadishinda panshì, kacyi mwimànyine pa makàsà èndè to. Ùvwa nè mpàla wèndè, mwaba wùvwa makàsà èndè nè cyà kwikala, didìpwekesha.

122 Yone Mubàtiiji, mupròfeta munène awu, wakumpàla bwà kwikala pa buloba mu bidimu nkàmà yinaayi, kàdi yèyè kwamba nè: "Ncyènà mukùmbàne bwà kulenga makàsà Èndè to, bwà kusùùlula nshinga wa sàndalà Wèndè to."

¹²³ Nwamònu's, ewu uvwa ku makàsà èndè awu, mabwikila, cìvwa cyùmvwija didipwekesha. Tàngilàayi musadidi ewu mpindyewu kumpàlà kwà Nzambi: mpàlà Wendè mubwikila mu kaneemu kààbùngì, makàsà Èndè mabwikila mu didipwekesha, èyowà's, nè mumanyè ànu menemene byà . . .Ikàlà mumanyè menemene bukesè bwèbè.

¹²⁴ Twètù bònso tudi tuteeta kwikala kampàndà wa munène. “Mémè's ki Docteur *Kampàndà*, munene *Kansanga* wa Kampàndà.” Wèwè kwèna nè cyùdi to. Ncyà bushùwà. Aci's cidi ànu . . .Kwèna cintu nànsha cìmwè to. Wèwè muswè kumanya mùshindù wùdi munène, ela munu wèbè mu dijiba dyà màyi nè ùwùpàtùlè, kàdi ùpetululè disòsù mwaba wùvwà mwelè munu awu. Nwamònu anyi? Kapèèna cintu nànsha cìmwè to. Nènkù ke citùdi twètù ncyòci aci. Nzambi ùdi mwà kwenza twètù katùyikù to, kàdi katwèna mwà kwenza cintu Yèyè kàyikù to. Wèwè udi nganyi? Nwamònu anyi?

¹²⁵ Ikàlà mumanyè mùshindù wùdi mukesè. Njila wa muulu nkupweka. “Ewu udi udipwekesha neàbandishiibwè; ewu udi udibàndisha neàpwekeshiibwè.”

¹²⁶ Ànu àbìdi àdi panshi aa mvwa mubiikidiibwe ku Chicago, kùdi kasumbù kàà bansantu, bwà kwakula. Mwambi kampàndà munène wa beena Mpenta kuntwaku mwikàle nè màpòlomè matwè ku ànaayi à mu tulaasà tutùmbùke, nè bikwàbò, nè ewu kàvwa muswè mùshindù wànyi mukesè wà kwakula wà muntu mupyamùpyà kuntwaku kumpàlà kwà nsangilu munène uvwabò mwà kwikala nendè, pa nànkù yèyè ùvwa nè muntu kampàndà wa mu cilongelu cinène cyà Bible kuntwaku, bwà kulwayè, cilongelu cinène cyà Bible cyà mu Chicago aci, bwà kwakulayè. Nènkù muntu awu kwambayè nè mpindyewu cidìye mufwànyine kwenza: “Nkuya kuntwaku nè kupeetula bantu abu, bwà cintu cyònsò cìvwàye mwà kwelela meeji, bwà mùvwàbo bapùile pa kwitabuujà nè kùvwa Nyumà Mwimpè nè bintu byònsò byà mùshindù awu,” kumpàlà kwà beena Mpenta. Kubàndayè kuntwaku nè cyàdi citàdika, nè—nè nshìngù wa nkoolò mukùdimuna, bu muvwàle nkooci wa tuxedo, kwadijayè tuntu twèndè twònsò tùvwàye mufùnde pa cibumbà cyà ku cyambilu apu. Yèyè ùkaavwa mumanè kucilongolola bimpè mu mùshindù wà nè ùvwa ànu mwà kuumvwija Bible, nè Nzambi kàyì mumanyè kantu nànsha kàmwè pa Cyòci aci to.

¹²⁷ Kàdi katanci aka, nwènù . . .Yèyè kumòna nè kabyàkapetangana nè bantu abu to. Kutùngunukayè nè kwambva cikwàbò cintu mùshindù awu, nè bàakashàla ànu batàngilàngàne muntu nè mukwèndè. Kacyàkapetangana nè bantu bàà mùshindù awu to, beena Mpenta abu. Pa nànkù paanyimà pàà katanci wàkamòna nè ùvwa mucimùnyìibwe, è kwambulayè bintàkanyi byèndè kubyela mu dyàpà, kuumukayè pa cibumbà cyà ku cyambilu, nè mutù wèndè mwinyika, wènda mwinàme. Munsantu kampàndà mununu musòmbè ku cimanu,

kwambayè nè: “Bu wikalakù nànsha mubànde mùshindù wùvwàye mutùùlùke ewu, nùnkù’s mmutùùlùke mùshindù wùvwàye mubànde awu.” Nènku’s ke mùshindù awu wùdìbi, kàbìdì.

¹²⁸ Dìpwekèshè, ùmonè mùdì mwà kwikala mukèsè; kí ncyùdì mumanyè to, ncyùdì kùyì mumanyè aci. Dìpwekèshè wèwè mwinè kumpàlà kwà Nzambì.

Mpindyewu tudi tusangana, ciisàtù nè, Yèyè ùvwa mwà kubùùka nè mapwâpwà makwàbò àbìdì awu.

¹²⁹ Mpindyewu tàngilàayi, dyàmbedi, Yèyè, mu Bwikadi bwà Nzambì, Ùvwa nè kaneemu, nè mpàla Wendè mubwikila. Ciibìdì, Yèyè ùvwa mudìpwekèshe kumpàlà kwà Nzambì, nè makàsà Èndè mabwikila. Nè mapwâpwà Èndè àbìdì àdì àlondà awu, Ùvwa mwà kubùùka, kuMutèèka mu mudimu. Kaa, ekèlekèlè!

¹³⁰ Cìvwà Nzambì munkaci mwà kwenza ncinyi? Ùvwa munkaci mwà kuleeja mupròfetà mùvwà musadidi Wendè mulongolola nè cyà kwikala. Nzambì ùvwa ùleeja nè: “Aba mbasadidi Bàanyi. Aba m’Bàanyi. Tàngilàayi mùdìbo badìlongòlòlè; bàà kaneemu kààbùngì, badìpwekèshe, nè mu mudimu.” Mùshindù awu ngùdì basadidi bàà Nzambì. Kaa, ekèlekèlè!

¹³¹ Mùshindù awu ngùvwàbi bikèngela bwà twètù kwikala: nè kaneemu kààbùngì ku Dìyì dyà Nzambì, badìpwekèshe, nè mu mudimu bwà Nzambì.

¹³² Bu mukàjì awu pààkabiikidiibwàye bwà kwenza cyenzedi, wàkalwa, pàakambàye nè: “Lwâyì, kanùmonàayi Muntu Udi mungambìlè bîndì mwènzè.”

¹³³ Cimanyinu cyèndè cìvwa cimwenzèje, bwà nè Yèyè nguvwa Maasiyà awu. Yèyè nè: “Mukalenge, tudi bamanyè nè, pààlwà Maasiyà. . . Mpindyewu, Wèwè udi nè cyà kwikala mupròfetà. Tudi bamanyè nè, pààlwà Maasiyà, Yèyè ke watwàmbila maalu aa.”

¹³⁴ Nwamònu’s, yèyè ùvwa mutèkèmène bwà kwambaYè nè: “Èè, Maasiyà ùlwalwa kàtàatakà; Mèmè ndi ànu mMudyanjidila Yèyè cyanàànà.” Kàdì Yèyè kwamba nè: “Mèmè’s ke Yèyè awu.”

¹³⁵ Cyôci cyàkamubweja mu cyenzedi ànu mpindyewu. Wàkaditwa mu cyenzedi. Kùvwa mwà kumwimanyika to. Cìvwa ànu bu nzùbu mukwàte kapyà, ànu bu mùmvwà mwambè dilòdòlò aci, mu cipeepèlè cikolè. Kanùvwa mwà kumwimanyika to. Yèyè kupweka mu cimenga amu nè: “Lwâyì, kanùmonàayi Muntu Udi mungambìlè bintu bîndì mwènzè. Ewu kí m’Maasiyà awu anyi?” Nwamònu anyi? Yèyè’s wàkaditwa mu mudimu.

Cyàkenzàye ncinyi? Wàkajuuka, dyàmbedi, wàkadipwekesha.

“Ntwàdilèku màyi à kunwà.”

136 Yèyè nè: “Mòna’s, baatatwètù’s bààkanwà ku ciinà eci,” nè bikwàbò. Ke—ke yèyè. . .

137 Yèyè nè: “Èè, nènkupèèshè Mâyì à kunwà; bwà kwikadi ulwa apa to.”

Yèyè nè: “Mukalenge, Mukalenge, mpèèshèku Mâyì awu.”

138 Nwamònu’s, ùvwa mudipwekèshe pa bwalu abu. Nènkupèèshè, dībà adi Yesù wàkamuleeja cimanyinu cyà Maasiyà, nè cyôci aci cyàkamubweja mu cyenzedi. Ûkaavwa pabwîpî nè kuya dībà adi, ùkaavwa mudilongòlòle bwà kwambila muntu yònsò uvwayè ùtwilangana nendè awu. Nwamònu anyi?

139 Mu bushùwà bwà bwalu, bilondèshile bilèlè byà ditunga dyà ku Esètè abi, bantu abu kabàvwa mwà kwikala batèèlèje mukàjì awu to. Mukàjì wa bwena awu kèna nè díyì munkaci mwà bantu to. Kèna naadi to nànsha kakesè. Kèna mwà kwambakù cintu nànsha címwè to. Kàdi wèwè udi uteeta kumwimanyika anyi? Yèyè’s ùvwa muditwe mu cyenzedi. Byàkakèngela bwà kwambilayè muntu kampàndà nè: “Lwàkù kùnu ùdimwènè wèwè mwinè. Muntu awu mmungambile ànu címvwà mwenze. Ki ng’aci citùvwà bindile anyi? Aci kí ncidi Mufundu wàmba, nè Maasiyà, pààlwàYe, Yèyè neenzè cyôci eci anyi?” Mukàjì awu wàkaditwa mu cyenzedi bwalu wàkadipwekesha, ke Nzambi kubwela munda mwèndè.

140 Peetèlò, pààkangatàye Díyì Dyèndè. Pààkeelàye makòndò bufùkù bujimà, bu mùvwàye mulòbi kuntwaku, ke kubwelayè, mutekète mu mabòko, kàyì nè mushipa nànsha. Mulòbi mwîmpè kanà yònsò ewu mmumanyè cidi bwalu abu, kàyì nè mishipa to. Dībà adi, cyàkumpàla, ùvwa musukùle makòndò èndè, muadije ku mwelelu wà musùlu, nè ùvwà ùanyika.

141 Ke Yesù kupweka nè kulòmba bwà kusomba bwátù bwèndè. Yèyè kuyiisha. Pashiishe kwambaYè nè: “Simonà, ndàaku uàkupè mu ndòndò wa màyi ùpwekeshè bukòndò bwà kukòka. Alùkilà ànu mwaba wùvwà mwelè bukòndò awu, bufùkù bujimà awu. Alùkilà ànu mwaba wùvwà mwenze mudimu mukolè, ku dībà nè ku dībà awu, nè pwekèshà bukòndò bwà dikwàta dyà mishipa yàbùngì, bwà dikwàta dinène.”

142 Mpindyewu mònaayi. Yèyè nè: “Mukalenge, tuvwa bakwàte mudimu mukolè bufùkù bujimà katwèna bakwàte cintu nànsha címwè. Kàdi ku Díyì Dyèbè, Mukalenge, nèmpwekeshè bukòndò. Ku Díyì Dyèbè!” Ke cyôci aci, kukwàcila Nzambi ku Díyì Dyèndè. Nènkupèèshè bukòndò, wàkakwàta mushiki munène wà mishipa mu mùshindù wà nè nànsha bukòndò mene bùkaavwa bwàmba kupandika.

143 Aci kàdi kumubweja mu cyenzedi. Èyowà’s, mukalenge. Bwenzeji bwà Yesù pambidi pèndè kumubweja mu cyenzedi, nè yèyè kumacisha bukòndò. Ki Yesù kwamba nè: “Kùciinyi to, kubangila ku leelù nèukwatè bantu.”

144 Mpofo awu, pààkondopiibwàye, musòmbe ku ciibi cyà lupangu nè. . . anyi musòmbe mu mùsèsù. Kàdi Bàfaalèsà kwambabò nè: “Muntu kanà yònsò ewu uvwa uMujikula, anyi uvwa nè cyà dyenza nè Yesù, ùvwa mwà kwipaciibwa mu ntempèlù.”

145 Bòbò, bààkalwa, kukonkabò taatù nè maamù. Kwambabò nè: “Yèyè ùkaadi muntu mukolè; mukonkàayi.”

Yèyè kwamba nè: “Muntu, udibò bààbiikila Yesù, mmungondòpa.”

146 Bòbò nè: “Muntu ewu nngènzàmpèkàatù. Kàtu wa mu bisùmbù byètù to. Katwèna bamanyè kùdiYe mufùmine to. Pèèsha Nzambi butùmbi’s wè!”

147 Yèyè nè: “Mpindyewu, bwà nè Yèyè nngènzàmpèkàatù anyi to, mèmè ncyèna mumanyè to.” Yèyè nè: “Kàdi cintu cìmwèpelè cìndi mumanyè bushùwà; ncyà nè mvwa mpofo, ndi mpindyewu mwà kumòna.” Ke yèyè nè: “Cintu cyà pabwàci cidi nè, bwànyi mèmè, nwènu nudi nè cyà kwikala balombodi bàà nyumà bàà díbà edì, nènku Muntu ewu mmuntàbèje mèsù, kàdi nwènu kanùyì ànu bamanyè kùdiYe mufùmine to.” Cyàkenzàye ncyini? Wàkaditwa mu cyenzedi. Ncyà bushùwà. Cyàkamubweja mu cyenzedi, bwalu wàkatangalaja luumù Lwèndè mu ditùnga dijimà.

148 Bantu, mu Ditùkù dyà Mpenta, pààkabàmbilà Yesù bwà kwindilabò kuulu aku, nènku bàvwa mwà kwikala. . . Kupweka, nè pààkapwekà Nyumà Mwìmpè pambidi pààbò mu Ditùkù dyà Mpenta, pàvwàbo bapetè bwenzeji kùdi Díyi dyà Nzambi dimwèneshiibwe. Mpindyewu vùlukàayi nè, Yesù wàkamba nè: “Indilaayi ku Yelusàlèmà too nè panwàlwàcijiibwà nè Bukolè bwà ku Dyulu.” Bààkindila, kí mmatùkù mwandamukùlù to, kí mmatùkù citèèmà to; bààkindila munda mwà matùkù dikùmi, too nè pààkamwèneshiibwà mulayi. Nè Nyumà Mwìmpè wàkapweka nè kuDitàpulula, nè ndimì yà Kapyà yàkasòmba pamutù pàà yònsò wa kùdibo.

149 Nè pàvwàbo bapetè bwenzeji bwà Nyumà Mwìmpè apu, bààkaditwa mu cyenzedi, bènda bàtètuka bu bantu bakwàcike maala, bèèla mbilà mikolè, bààkula mu myakulu, bàpàtuka mu mùsèsù bàya.

Bàakamba nè: “Bantu aba mbùle tètè nè mvinyò mupyamùpyà.”

150 Yèyè, Peetèlò, kujuukayè, è kwamba nè: “Eci ncyàkambàbo kùdi mupròfetà, Yowèlà nè: ‘Nebyènzekè mu matùkù à ndekeelu.’” Cyàkenza cinyi? Cyàkamubweja mu cyenzedi.

151 NeÀkubwejè mu cyenzedi, pawìkalà kùyì muMupetè to, neÀkubwejè mu cyenzedi paùdi umòna Díyi dyà Nzambi dyùle. Citùdi bamòne mu matùkù à ndekeelu aa, s’bivwa bikèngela kutùbwejaci mu cyenzedi. Bivwa bikèngela kucyènzaci, bu twètù

ànu mwà kucyènza nè kaneemu kààbúngi nè didìpwekesha. Dikunji dyà Kapyà kumpàlà kwà Pòlò, dyàkamubweja mu cyenzi. Nènku leelù ewu patùdì tumòna Dikunji dyà Kapyà dimwèdimwè adi, ku maalu a mamanya, ku bipeta Byàdi, ku cyàkalayàDi aci, wènza nè Diyì mu matùkù à ndekeelu aa dyènzekè ànu menemene, bivwa bikèngela kutùbwejadi mu cyenzi. Bwà nè, cimanyinu cyàkafidiibwa nè: “Ànu mwàkadibi mu matùkù à Sodomà, pabwîpi menemene nè Sodomà kwoshiibwayè, ke mwikalàbi kàbidi ku dilwa dyà Mwànà wa muntu; Yèyè neàmwèneshiibwè cyàkàbidi, umweumwe awu makèèlèlè, leelù, too nè kashidi.” Bivwa bikèngela bwà kubwejacì cidimba cyònsò cyà Mubidi wà Kilistò mu cyenzi, kubwejamù cintu cyònsò cinùdi mwà kubweja aci, bwalu edi ndìbà dyà ndekeelu, ndibìikila dyà ndekeelu, dibìikila dyà ndekeelu. Ku mwákù nè ku mwákù, nDyùjiibwe. Dìvwa nè cyà kutùtèeka mu cyenzi.

¹⁵² Twètù, ànu bu mupròfetà, tudi bamòne bipeta byà màngumba àdi àdizànjika mùdìwu àjìmija mwaba wàwù mu Kilistò, bàjìmija dikwàtà dyàbò ku Dìyi Dyèndè, biitabuujà twitabàayi. Nè tudi bamòne cyàkènzekelà pààkenzàbù cyòci aci, bààkafwà mu nyumà. Tudi tumòna cyàkènzekelà ba-Luthériens pààkabèngàbò dibìikila dyà Wesley. Tudi tumòna cyàkènzekelà ba-Méthodistes pààkabèngàbò dibìikila dyà beena Mpenta. Mpindyewu bìshi bwà beena Mpenta? Nwamònu anyi?

¹⁵³ Tudi bamòne muntu mudibàndishi, mùshindù úvwà Uzìyà awu, wàkateeta kwangata kaaba kàà mudimu mwela maanyi awu. Mudimu wa muntu mu èkèleeziyà mmulaaba maanyi, kí mmufila to. Mmulaaba maanyi. Èkèleeziyà, kùdi . . . mpaasàtà, mutangadiki, mupròfetà, mùpostòlò, cidi nè cyà kwikala mudimu mwela maanyi wà Nzambi, kawùyi musungula kùdi muntu to. Muntu wàkateeta kwelela mudimu awu kakàndà musangu kampàndà, bààkeela nshòòbò bwàwù; mukwàcikwètù Maatiyà mukwàte nè byà luse awu kààkenzakù cintu nànsha cimwè to, kàdi Nzambi wàkasungula Pòlò nè wàkenza cintu kampàndà bwalu úvwa mwela maanyi. Nènku tudi tumòna biimikila majitu aba bateeta kwamba nè: “Ewu mmwèpiskòpò wa cijila *kampàndà*, ewu mmunène wa mbùlãmàtadi *kampàndà*, ewu yèyè's *mmuntu* kampàndà,” kacya kacitu nè kuyaayàci to. Kàdi pàdi Nzambi úbwela nè wàngata bukòokeshi, dìbà adi tudi tumòna dilaabiibwa dyà Nyumà Mwimpè dìshìndika Dìyi dyà Nzambi.

¹⁵⁴ Mpindyewu, bwenzeji bwà cikèènà-kumòna pa mupròfetà awu, cyàkenzelàbò muntu uvwa mulediibwe mupròfetà ewu ncinyi? Vùlukàayi nè, yèyè wàkafùnda Bible mujimà. Kùdi Mikàndà makùmi àsambòmbò nè yìsambòmbò yà Yeshàayi, nè Mikàndà makùmi àsambòmbò nè yìsambòmbò yà Bible. Údi úbanga, bu mu Genèsè; munkacinkaci mwà Mukàndà mùlwalwa Dipungila Dipyadìpyà, Yone Mubàtiiji; nè ùdi ùjikijila mu

Bukalenge bwà bidimu cinunu. Mupròfeta munène, umwe wa ku baprófeta bàà batámbe bunène bàà kacya twápeta, ùvwa n'Yeshààyi, nè yéyè wàkalediibwa bwà kwikala mupròfeta.

155 Kàdi pààkiimanàye mu Bwikadi bwà Nzambi, cyàkafikisha mupròfeta awu ku dyenza cinyi? Mupròfeta wákamba nè: “Dyàkabi dyànyi, bwalu ndi muntu wa mishikù mibiipe.” Bwà kubwela mu Bwikadi bwà Nzambi, nè kumòna dibùngù dilaaba bulelèlà dyà Nzambi, cyàkafikisha mupròfeta ku ditonda nè yéyè ùvwa ngènzàmpèkààtù. Cívwa nè cyà kutwènzela mùshindù awu, Bùvwa bùkèngela kwenzabò nàнку, Bwikadi bulaaba bwà Nzambi abu's. Pààkamònàye Kampàndà awu wèla lubilà, nè makunji ànyúkuka, nè Banjèlò aba bàtwa kumpalà bàtwa paanyimà, biikàle bàjaadika nè Bàvwa kumpalà kwà Nzambi, nè Bàvwa basadidi bàà Nzambi, balaaba maanyi, nè Bàvwa bèèla mbilà mikolè; yéyè ùvwa ngènzàmpèkààtù.

156 Cyàkenzekà ncinyi díbà adi pàvwàye mudilongòlòle apu? Mpindyewu tèelejàayi, bwà kujikija, ùvwa pabwípi bwà kutonda nè ùvwa ngènzàmpèkààtù nè: “Dyàkabi dyànyi, bwalu ndi muntu wa mishikù mibiipe, nè ndi musòmbèle munkaci mwà bantu bàà mishikù mibiipe. Dyàkabi dyànyi!” Pashiishe Mwanjèlò kwangata lukwàtù nè kwangata dikalà dyà ku cyoshelu, kudikwàta mu byanza Byèndè, nè kulwa kumusukula naadi. Pashiishe kulwakù dikezudiibwa, paanyimà pàà ditonda dyèndè.

157 Mpindyewu piikalà mupròfeta, yéyè mubiikidiibwe, mushindikiibwe bwà kwikala mupròfeta wa Nzambi, mu Bwikadi bwà Nzambi, pa kumòna bukesè bwèndè abu, ùvwa mudilongolole bwà kutonda nè yéyè ùvwa ngènzàmpèkààtù, ncinyi civwà cikèngela bwà wèwè nè mèmè kwenza? Kàdi nudi bamanye citùdi twenza anyi? Tukùpa mutù wètù tupátuka tuya twenda tuseeka. Ke mwaba wutùdi biimàne awu, too nè pààlwà dikezudiibwa. Tàngilàayi, Yeshààyi. . .

158 Ndi muswè bwà numòne cingà cintu. Nzambi kàakakwàta mudimu nè mikàndà nè tèlòlòji, myàkù yà tèlòlòji, bwà kukezula musadidi Wendè to. Wàkakwàta mudimu nè Kapyà. Yéyè kàakakwàtakù mudimu nè twitabàayi bwà kukezula musadidi Wendè to. Wàkangacila Kapyà pa cyoshelu. Nènku piikalàbi nè Nzambi úkaadikù mukezule muntu leelù ewu, bikèngela ciikalè Kapyà kàà Nyumà Mwimpè kàdi kàkezula muntu; kí nkubala mukàndà nè kwenza *cikampàndà*, anyi mukàndà mukwàbò mufunda kùdi *kansanga* to.

159 Mwambi kampàndà munène mu Californie emu kwambayè, ditùkù adi nè, ùvwa nè “mukàndà wà cidimu.” Mèmè ndi mpangakana nendè. Mukàndà wà cidimu m'Bible, ke mùtùbi misangu yònsò. Mukàndà wà cidimu m'Mukàndà wà Nzambi, misangu yònsò.

160 Nènku Nzambi wàkakwàta mudimu nè Kapyà bwà kukezula musadidi Wendè. Pashiishe cyàkalondà, paanyimà pàà yéye mumanè kutonda nè didipwekesha dyônsò nè ùvwa mupîile, ke dibà adi dikezudiibwa kulwadi; nènku paanyimà pàà dikezudiibwa, pashiishe kulwakù dimutùma nè mudimu. Nwamònu's, ke lutàtù lùdiku ndwòlò alu, bàmwè bàà kutùdi bàdi bàteeta bwà kutumiibwa nè mudimu kumpàlà kwà twètù kukezudiibwa. Nwamònu anyi? Netwámbe nè: “Èè, néndondè *cikampàndà*.” Bikèngela tùlondè Nzambi. Banjèlò abu bààkenza cintu cimwèpelè, bàvwa basòmbe mu Bwikadi bwà Nzambi; badipwekèshe, mu kaneemu kààbùngi, nè mu cyenzi kumpàlà kwà Nzambi. Pashiishe civwà cìlonda, mudimu mumutùma naawù; paanyimà pàà ditonda nè dikezudiibwa, divwa ndîbà adi dyàkeelà Yeshàayi mukezùke awu lubilà nè: “Mmémè ewu; ntùmaaku.”

161 Kaa, mwanèètù wa balùme, mwanèètù wa bakàji, bu nè kùvwakù cikondo civwà baaYeshàayi nè cyà kupweka ku nzùbu wa Nzambi bwà kukezudiibwa! Bu nè kùvwakù cikondo civwà cidimba cyà èkèleeziyà nè cyà kulwa bulelèlè nè kutonda mpèkaatù yèndè! Pìikalàku kùvwakù cikondo kampàndà bwà muntu mutwè cimpingà!

162 Anji elàayiibi ànu meeji, mu bufùkù bwàkooshiibwà Sodomà abu, ndi ndikonka nè mbantu bùngi kaayi bààkayà kule nè mukenji wà Banjèlò abu? Ndi ndikonka nè mbantu bùngi kaayi bàvwa kabàyi batàmba kucyùka bwà kuumvwa dīyī Dyàbò? Nè bààkabùtuka dilòlò dimwèdimwè adi, nè kabààkwikalakù kabìdi to, ànu dinyooka dyàbò mu ifèrnò.

163 “Ànu mwàkadibi mu matùkù à Noà.” Mbantù bùngi kaayi bààkamusekà nè kumwelulwila, nè balwè kuntwaku ànu bwà kutèeleja dyèndè, bàmba nè: “Netùbande bwà kutèeleja mukùlumpè wa cimfiikààmùndà awu cyàkàbìdì, ànu bwà kumwelulwila.” Bàjuuka, bàkwàta njila bàya, kabàyikù nànsha bafwànyine kumutèeleja ùyiisha to. Bintu byà mīshindù yònsò; nè bààkabùtuka mu manyooka àvwàye munkaci mwà kuyiisha awu.

164 Amòsà, muyiishi mukèsè awu, kabàyi bamanyè. . . kùvwàye ùfùmina to, mupròfetà kampàndà, nè dilaabiibwa, kuseemenayè nè kupwekesha mèsù mu Sàmaalèyà musangu awu. Mutù wèndè wà dibàla awu ùbàlakana, mwedi wèndè wà kale wà mvya awu, pàvwàye wènda ùbànda ùfùmina dyàmwàmwà dyà kakùnà aku apu. Wàkapwekesha mèsù panshì, mèsù èndè à cijila awu makèèpesha pàakatàngilàye pa cimenga aci, kabiyi bu babandidi bàdi bafùmine pa buloba bujimà to. Bwalu, baakwidì, bònsò bwàbù, bàvwa benze mpèkaatù, nè bapròfetà bàà mashimi bàvwa bàbàmbila nè bìvwa ànu bìmpè. Wàkapweka kuntwaku kàyi nè dimwela dyà mu dibòko bwà ditàbuluja dyèndè to. Wàkapweka kuntwaku kàyi kantu nànsha kàmwè to, wèla mbilà

mikolè. Ke yèyè nè: “Nzambi mwinè, unùdi nulàka mukana nwamba munùdi nukwàcila mudimu awu, ngwanùbütula.”

¹⁶⁵ Nènku ndi ngàmba nè EMU MMUDÌ MUKALENGE WÀMBA: Nzambi, udi Àmèrikè wàmba nè ngudiyè ùkwàcila mudimu awu, ke wàmubütulà. Nwènù angàtaayi aci mwònsò munùdi baswè amu. Cidì citùkèngelà, nkupweka ku cyoshelu eku, bu Yeshàayi. [Katùpà kàà mukàbà wà mèyi munda mutupù—Muf.]

Ke Nzambi kwamba nè: “Wàyà kaaba Kàànyì nganyì?”

¹⁶⁶ Yeshàayi wàkamba nè: “Mmémè ewu; ntùmaaku.” Ndi ngèèla meeji ku musambu awu wà nè:

Pàakalengabo mupròfetà kùdi dikalà dya
Kapyà,
Dimuvwija mukezùke ànu nè mwèndè
mwònsò,
Pàakambà Dìyi dya Nzambi nè: “Wàyà kaaba
kèètù nganyì?”
Dìbà adi kwandamunayè nè: “Mfùmù, mmémè
ewu, ntùmaaku.”

¹⁶⁷ Dyàmbedi byàkakèngela bwà kudipwekesha nè kukezudiibwa, nè kudìlongolola mutùdi bamòne musadidi mulongolola awu. Tàngilàayi Uzìyà mùvwàye mulongolola amu, kàdi’s wàkapangila. Kanùteeki. . .

¹⁶⁸ Wèwè udi wamba nè: “Èè, mpindyewu, mèmè’s ndi mumanyè nè Docteur *Kampànda’s* mmuntu mwimpè. Mèmè’s ndi mumanyè Mwanèètù *Kansanga.*” Mbafwànyine kwikala nàнку, kàdi kanùtàngidi aci to.

¹⁶⁹ Bandulukàayi *kunweku*, nwamònu’s, s’ke Njila *ewu*. Nzambi udi nè Mùshindù wà kulongolola. Wàkacyènza bìshi? Mu Ditùkù dya Mpenta, Peetèlò wàkabàmbila cyà dyenza. Wàkabàfundila mukàndà wà bwanga, nè wùtu mushàale ànu wùmwèwùmwe awu. Kùwùnyangàkàjiku to, nèushipè mubèedi webè awu.

Bóbò nè: “Tudi mwà kwenza cinyi bwà kusùngidiibwa?”

¹⁷⁰ Yèyè nè: “Nyìngalàlaayi, muntu nè muntu wa kunùdi, nùbatiijibwè mu Dìna dya Yèsù Kilistò bwà dilekelediibwa dya mpèkaatù, nènku nenùpetè kupà kwà Nyumà Mwimpè. Bwalu mwayi wùdi kunùdi, nè kùdi bânà bèènù balela, nè kùdi aba bàdì kule, mu bùngi bwònsò bwàbìikilàbò kùdi Mukalenge Nzambi wetù abu.”

¹⁷¹ Aci’s ncyôci eci mwab’ewu mene dilòlò edi. Pìikalà Nzambi muciiikàle ànu ùbìikila, s’ke kabèji kàà bwanga nkòkò aku. Udi ànu mwà kutùngunuka nè kwakidila Nyumà Mwimpè umweumwe wàkapetabò kwàka awu, ànu. . . Udi mwà kwakidila cintu cimwècimwè aci dilòlò edi. Londà wèwè ànu cyanàànà. Ke cyònsò cyùdi wenza. Èyowà, dìbà adi udi mwà kwamba nè:

Pàakalengabo mupròfetà kùdì dikàlà dyà
 Kapyà,
 Dìmuvwija mukezùke ànu nè mwèndè
 mwònsò,
 Pàakambà Dìyì dyà Nzambì nè: “Wâyà kaaba
 kèètù nganyì?”
 Pashiishe kwandamunayè nè: “Mfùmù,
 mmémè ewu, ntùmaaku.”

Tùwímbààyi's.

Akùlà, Mukalenge wanyì, akùlà, Mukalenge
 wanyì,
 Akùlà, nè mèmè nêngìikalè nè lùkàsà bwà
 kuKwandamuna;
 Akùlà, Mukalenge wanyì, akùlà, Mukalenge
 wanyì,
 Akùlà, nè mèmè nêngàdamunè nè:
 “Mukalenge, ntùmaaku.”

¹⁷² Tèèlejààku kùnu's, mwanèètù.

Kùdì miliyò mpindyewu mu mpèkaatù nè
 bundù, munkaci mwà kupùnga nè lufù,
 Kaa, tèèlejà lubilà lwàbò lwà dibungama nè
 kànjaabàla;
 Kolèshàku, mwanèètù, kolèshàku ùye
 kabàsùngila;
 Mpindyewu andàmùnàku nè lùkàsà lwònsò nè:
 “Mfùmù, mmémè ewu.”

Kaa, akùlà, Mukalenge wanyì, akùlà,
 Mukalenge wanyì,
 Akùlà, nè mèmè nêngìikalè nè lùkàsà bwà
 kuKwandamuna;
 Kaa, akùlà, Mukalenge wanyì, akùlà,
 Mukalenge wanyì,
 Akùlà, nè mèmè nêngàdamunè nè:
 “Mukalenge, ntùmaaku.”

¹⁷³ Twìnyikààyi mitù yètù. [Mwanèètù Branham ùdì wimbila
 mu matàma *Akùlà, Mukalenge Wanyì*—Muf.]

Dìmuvwija mukezùke ànu nè mwèndè
 mwònsò,
 Pàakambà Dìyì dyà Nzambì nè: “Wâyà kaaba
 kèètù nganyì?”
 Pashiishe kwandamunayè nè: “Mfùmù,
 mmémè ewu, ntùmaaku.”

Udikù muswè kwikala mudipwekèshe nè mukezùdìibwe
 anyì?

Akùlà, Mukalenge wanyì, akùlà, Mukalenge
 wanyì,

Akùlà, nè mèmè nêngiikalè nè lùkàsà bwà
 kuKwandamuna;
 Akùlà, Mukalenge wanyì, akùlà, Mukalenge
 wanyì,
 Akùlà, nè mèmè nêngàdamunè nè:
 “Mukalenge, ntùmaaku.”

174 Pàdìbo munkacì mwà kwimba mpindyewu apa, kùdikù Yeshààyi kàmpàndà kaaba aka dilòlò edi, anyì lukàmà, udi muswè kuya awu, muswè dikezudiibwa dyà Nzambi mu nsòmbelu webè anyì? Nwènù bàdì kabàyi bamanyè Kilistò bu Musùngidi wenù abu, nudi babiikidiibwe mpindyewu ku cyoshelu, piikalàYe wàkula nè mwoyi wenù. Ncyèna mutámbe kunànukila mu diswishisha to. Ndi ngèèla meeji nè Nyumà Mwímpè Yèyè mwinè ke udi utwìshisha. Kàdi pawìkalà kaaba aka, nè kùyì nè Kilistò to... Mpindyewu vùlukà nè, wèwè newàdamunè ku Ditùkù dyà Cilumbulwidi, bwà cyùdi wenza nè cyòci eci dilòlò edi. Nwamònu anyì? Mpindyewu wèwè muswè kulwa, ndi kaaba aka bwà kusambilakù pàmwè neebè.

175 Mu Dìna dyà Kilistò, ndi nkupèèsha mpùngà wa wèwè kulwa, kukèba Nzambi, nè disànkà dyònsò udi mufwànyine kuMupeta. Bansongà, bantu banunu, bashindàme, bidimba byà èkèleeziyà, nànsha wèwè mwikàle nganyì; piikalà Kapyà kàà Nzambi, ku Nyumà Mwímpè, kakàyi kakukezùle munda mwà mwoyi wèbè to, too nè mwaba wùdi witabuuja Dìyi dyònsò dyà Bible ewu, nè Kilistò mwikàle ntèmù udi nè mwoyi wa wèbè... mu mwoyi wèbè, nè Yèyè mmubiishiiibwe ku bafwè, dìbà adi ndi nkubiikila ku cyoshelu. Lwàkù apa tusambilè pàmwè neebè. Ndi ngiitabuuja nè bònsò bwènù, dìbà adi, bilondèshila cyenzedi cyènù, nè nudi basùngidiibwe.

176 Dìbà adi, kùdikù muntu mutwè cimpingà mwab'ewu udi muswè kulwa anyì? Ndi nkulòmba, bu musadidi wa Kilistò nè, bu wèwè mwà kupweka mwab'ewu bwà túsambilè neebè. Ncyèna ngàmba nè neÀkwalùjè to; ndi ngiitabuuja nè neÀkwalùjè. Kwèna muswè kulwa bwà kuciteeta mpindyewu anyì? PiikalàYe ùyiikila neebè, lwàkù.

177 Aba bàdì kabàyi nè dibàtiiza dyà Nyumà Mwímpè abu? Ndi ncinkila nè kakwèna muntu nànsha umwe kaaba aka udi kàyì, udi mutwè cimpingà to. Bantu bònsò, dìbà adi, bàdì nè cyà kwikala badilame mu disambila; biikàle beena Kilistò, nè badilame mu disambila. Nènku pawìkale mudilame mu disambila, kàdi kùyì mupetè dibàtiiza to, nè wèwè muswè bwà Nzambi kukupèèshaDì, ke webè mpùngà dìbà edi, mpindyewu.

178 Kùdi muntu mulùme umwe mwab'ewu udi kàyì Nendè to. Mwoyi wèndè mupwekèle ùbèneshiiibwè. Ndi ngèèla meeji nè n'Yeshàyi mukwàbò.

Mpindyewu bàndululààyi mitù yènù dìbà adi.

179 Kùdi muntu umwèpelè udi mwinàme mwab'ewu ku cyoshelu eku, umwe ùndi ngèlè meeji nè n'Yeshàayi.

Mpindyewu Yèyè ùdi kaaba aka. Nudi nwitabuuja nè Yèyè ùdi kaaba aka anyi?

180 Mpindyewu nènwambilè cinùdi bènzè. Nudi bènzè cintu cyà citàmba kwenza bwôwa cinùkaadiku bènzè. S'kùdi bantu nkàmà yibidi anyi yisàtù kaaba aka bàvwà bàkèngela kwikalabò ku cyoshelu.

181 Lekèlaayi nnuleejèku, mu Dìnà dyà Mukalenge nè, ndi mubingè mu bìndi ngàmbe ebi. Tàngilàayi. Bàmwè bàà kunùdi nwènù bàdi kaaba aka, sambilaayi.

182 Mwab'ewu, inǎbǎnzà kampàndà nyèyè ewu musòmbe mwab'ewu mulwàte nkooi mutòòke, nkòlotò mukesè mutòòke, kacya ànu wàntàngila. Ncyèna mwà...Mmwena Kilistò. Kàdi ùdi munkaci mwà kusambila bwà butekète kampàndà. Ùdi nè binyòka. Udi witabuuja nè Nzambi ùdi mwà kukusàngaja, kukwondopa anyi? Dìbà adi udi mwà kucipeta.

183 Muntu udi ulonda, udi musòmbe ku luseke lwèbè aku awu, ùdi nè cintu kampàndà cìmutàcisha mu maci. Udi witabuuja nè Nzambi ùdi mwà kwondopa disaamà dyèbè dyà maci adi, mukalenge, nè kukusàngaja anyi? Eyowà. Elà cianza cyèbè muulu pawikalà witabuuja.

Mpindyewu swâyikù nwikalèku nè kaneemu kààbùngi, katanci kakesè cyanààna.

184 Muntu udi mumulondèle awu ùdi ùsaama disaamà dyà mwoyi. Udi witabuuja nè Nzambi ùdi mwà kukwondopa, mukalenge, nè disaamà dyà mwoyi adi anyi? Mèmè ncyèna mukumanyè to. Wèwè udi mwenyi kùndi. Ncyà bushùwà anyi? Wèwè udi mwenyi. Èè, tèèlejà. Bu Nzambi mwà kungambila nè wèwè udi nganyi, ncifwànyine kukwambulwisha anyi? Udi mwà kungumvwa bimpè anyi? Dìnà dyèbè m'Mukalenge Blackwood. Udi witabuuja nè Yèyè ùdi mwà kungambila kùdi mufùmìne anyi? Udi wa ku Riverbank, mu Californie. Aci ní ncyà bushùwà, juukilà kuulu. Ncitungù mwanji kumumòna to, kacya bàndela. Eyo.

185 Nzambi àkubènèshè, mukalenge. Diitabuuja dyèbè dyàkusàngaji. Inǎbǎnzà udi musòmbe ànu ku luseke lwèbè aku awu, ùdi nè disaamà dyà mutù mubindùlùke. Udi muswè kwondopiibwa ku dibinduluka dyèbè adi anyi? Elà cianza cyèbè muulu, pawikalà muswè. Mutentèkèle cianza cyèbè, mukalenge, bwà yèyè wàmòna mwà kwondopiibwa.

186 Inǎbǎnzà udi musòmbe ku luseke lwèbè awu, mpindyewu, ùdi nè disaamà dyà nsùkaadi, udi mulwàte nkanzu mukùnze awu. Mmuswè bàmùsambidilà, yèyè pèndè. Nwamònu anyi? Mmuswè bwà bàmùsambidilè. Ikàlà nè diitabuuja.

187 Inābànzà nyéyè ewu musòmbè lwà paanyimà apa. Ûkaadi mudilongòlòle bwà dipandiibwa. Bu yèyè ànu mwà...Éyì Nzambi wa yààya! Ûdi nè matrice mapwekèlèle bikolè. Dinà dyèndè m'Mandāmwānzèlè Maxwell. Itàbùùjà. Juukilà kuulu, itàbà dyondopiibwa dyèbè, Mandāmwānzèlè Ma-...Kwèna nè kartà kàà disambila to, kí mmwómò anyi? Kwèna nè kartà kàà disambila anyi? Èyo, kwèna mene naakù dijinga to. Elà cyanza cyèbè muulu piikalàbi nè ncyà bushùwà. Ncyèna mukumanyè to. Piikalàbi nè ncyà bushùwà, nyungishà cyanza cyèbè. Katwèna bamanyàngàne to, nyungishà cyanza cyèbè mūshindù ewu.

Ncinyi cidiye mulenge's? Yèyè kí mmundengàku mèmè to.

188 Mukalenge Stewart, udi pèèbè, muswe kwondopiibwa, ku dibinduluka, nè kwitabuujà nè Nzambi neàkusàngàjè anyi? Ndi mwenyi kùdi. Kàdi ke cyùdi's, nè udi usaama dibinduluka. Mbikolè bwà wèwè kudilama kaaba kāmwe. Juukilà kuulu witabè dyondopiibwa dyèbè, mu Dinà dyà Yesù Kilstò.

189 Inābànzà nyéyè ewu musòmbè lwà paanyimà pèèbè apu. Ûdi pèndè, nè dibinduluka. Ûdi nè cintu kampàndà cidi kaciyi cyènda bimpè to mu misunya yà mubidi wèndè amu. Yèyè neàcipangilè nè...Mādamù Newell, imàna kuulu, piikalàdi ndīnà dyèbè nè dyòdi diinè adi ke dyèbè. Itàbùùjà!

Udi witabuujà anyi?

190 Bushùwà, inābànzà nyéyè ewu musòmbè kaaba aka mene, ùdi nè disaamà dyà mwoyi nè lwendu lwà mashi àya lubilu lukolè. Udi witabuujà aci anyi, mmwómò anyi, mwanèètù wa bakàji? Juukilà kuulu piikalàci cyà bushùwà.

191 Inābànzà udi musòmbè ku luseke lwèbè aku awu, ùdi nè cintu kampàndà mu cyādi cyèndè amu. Aci ní ncyà bushùwà, juukilà kuulu.

192 Ambilà inābànzà, udi ku luseke lwèndè awu, ùdi nè byūjà kwisù kwèndè, tuubyūjà tukesè bu nānku. Piikalāye muswè bwà kwondopiibwabi, mwambile imanyinè kuulu nè itabè.

193 Mpindyewu kùdi musùmbà wà kunùdi mwab'ewu bàdi nè cyà kwikala ku cyoshelu, munkaci mwà kukèba Nyumà Mwimpè. Aci ng'EMU MMÙDÌ MUKALENGE WAMBÀ. Nudi bamòne cīndi njinga kwamba aci anyi? Bwà musangu ewu kabidi nèngènzè dibūikila edi. S'ke dishindika ndyòdi adi dyà nè ndi nwanbila bulèlèlè. Nzambi ùdi munkaci mwà kwakula nè bantu kaaba aka, kàdi nudi nè mpatà ndambù. Udikù mwà kwikala nè meeji matòòke makùmbàne bwà kwela cyanza cyèbè muulu, kwamba nè: "Éyowà's, Mwanèètù Branham, mèmè ntu misangu yònsò ànu ntènkakana ndambù. Ndi muswè Nzambi wabūngi. Ndi mumanyè nè kùdi cintu kampàndà cīndi mupangile kaaba aka, nè civwà cikèngela bwà mèmè kwikala naaci pāmvwà njikula dibātiiza dyà Nyumà Mwimpè apu"? Elà cyanza cyèbè muulu, udikù mwà kwenza nānku anyi? Ikàlà wèwè

ànu nè meeji matòòke kùdi wêwè mwinè. Nyumà Mwîmpè kacya kàtu mupiile nànsha. Bwà cinyi kùyiku ulwa, dîbà adi, bwà kujikija mpatà ayi? Lwâkù's! "Mémè nêngeenzè lùkàsà . . ."

Akùlà, Mukalenge wanyì, akùlà, Mukalenge wanyì, (Ke cyôci aci's.)

Akùlà, nè mémè nêngiikalè nè lùkàsà bwà kuKwandamuna;

¹⁹⁴ Nwamònu's, ncyèna nzwàmbila cintu kampàndà cibì to, balundà bàanyi, n'Nyumà Mwîmpè munkaci mwà kubiikila, s'kùdi nkàmà mwab'ewu. Nwênù biitabùùje nè ndi mupròfetà, mpindyewu, vùlukàayi nè, ndi nzwàmbila, mu Dîna dyà Mukalenge nè: Nuvwa baseeswishiibwe! Lwâyaku!

. . . dikàlà dyà Kapyà òvwa dilenge mupròfetà, Dimuvwija mukezùke ànu nè mwèndè mwònsò,

Pàakambà Dìyi dyà Nzambi nè: "Wâya kaaba kèètù nganyi?"

Pashiishe kwandamunayè nè: "Mfùmù, mmémè ewu, ntùmaaku."

¹⁹⁵ Kwênàku muswè kwamba cintu cimwècimwè aci anyi? Nàнку juukilà kuulu, elà byanza byèbè muulu.

Akùlà, Mukalenge wanyì, kaa, akùlà, Mukalenge wanyì,

Akùlà, nè mémè nêngiikalè lùkàsà bwà kuKwandamuna;

Akùlà, Mukalenge wanyì . . .

¹⁹⁶ CìdìYe munkaci mwà kwenza ncyini? ÒMwandàmùnè dîbà adi, piikalàYe munkaci mwà kwakula. Piikalaku mpatà mikesè mwaba kampàndà, wêwè kùyi mutwishiibwe mpindyewu bwà eci to, kùnàyikù nè mudilu to.

. . . "Mukalenge, ntùmaaku."

Kaa, akùlà, Mukalenge wanyì . . .

Yèyè ngudi wakula. Lwâkwaku.

. . . Mukalenge wanyì,

Akùlà, nè mémè nêngiikalè nè lùkàsà . . .

¹⁹⁷ Mpindyewu, balùmyàna, ncyèna nè meeji matùma ku dikolesha dyà maalu to. Ncitu nè meeji matùma ku dyamba dyà bintu bibì to. Ndi ndyùmva mulombòdìibwe pàndi ngàmba cìndi ngàmba aci.

. . . Mukalenge wanyì,

Akùlà, nè mémè nêngàdamunè . . .

¹⁹⁸ Wêwè udi wamba nè: "Bantu nebàmbè cinyi pa bwalu abu?" Ncidi Nzambi mwà kwamba pa bwalu abu, ke cyôci.

" . . . ntùmaaku."

Akùlà, Mukalenge wanyì, (Ncyà bushùwà.)

Akùlà, nè mèmè nêngiikalè nè lùkàsà bwà
kuKwandamuna;

. . . Mukalenge wanyì, kaa, akùlà, Mukalenge
wanyì,

Akùlà, nè mèmè nêngàdamunè nè:
“Mukalenge, ntùmaaku.”

Kùdi miliyô mpindyewu mu mpèkaatù nè
bundù bàdi bàpùnga nè lufù,

Kaa, tèèlejà mwadi wàbò wà dibungama nè
kànjaabàlà;

Kolèshàku, mwanèètù, kolèshàku ùye
kabàsùngila;

Kaa, andàmùnàku nè lùkàsà lwónsò nè:
“Mfùmù, mmèmè ewu, ntùmaaku.”

Kaa, akùlà, wanyì. . .

¹⁹⁹ Mpindyewu muntu yónsò mwab’ewu, tudi baswè
kudìlongolola bwà mudimu munène wà dyondopa mààlabà,
kàbìdi. Nènku ndi muswè bwà yónsò wa kunùdi nwènù bambi
àseemenè pabwìpì nè bantu bàdi bàkèba Nyumà Mwímpè aba,
kanwìmanyiki ànu mu tusunsa tùtaanu cyanààna to, shààlaayi
mwaba awu too nè. Too nè díbà kaayi? Too nè pààlwà Nyumà
Mwímpè.

. . . Mukalenge wanyì,

Kaa, akùlà, nè mèmè. . .

²⁰⁰ Mpindyewu batèèleji bàtentekelè muntu mukwàbò cyanza,
tentèkèlàngànaayi ànu cyanza muntu nè mukwèndè, pa muntu
kampàndà; nwènù bìikalà mwà kusambila, bàdi bàleeja mpàlà
wa bantu bàdi kaaba aka aba.

. . . Mukalenge wanyì,

²⁰¹ Mpindyewu tujila ntupàte patapata, ku cyeshilu nkupàte
patapata, kùdi bantu batwè ku lukàmà nè makùmi àtaanu,
nkàmà yìbìdi.


. . . Mukalenge wanyì,

Akùlà, nè mèmè nêngàdamunè. . .

²⁰² Mpindyewu bangàaku kusambila nè: “Mukalenge,
ntùmaaku! Akùlà, Mukalenge wanyì! Mukalenge, ntùmaaku!”

²⁰³ Ondòpàku aba nùnkù, Mukalenge, mu Dìna dyà Yesù
Kilistò. Mukalenge, enzàku nànkù. Éyì Nzambì, andàmùnaaku
masambila à bóbò aba.

²⁰⁴ Kùlekediku to. Shààla wèwè ànu mwaba awu too nè
pènzekàci. Shààla wèwè ànu too nè pawàtèèleja lubilà lwà
Nzambì. Shààla mwimàne too nè pààkunyùkusha Bakelùbà,
Nyumà Mwímpè mmwangate dikàlà dyà Kapyà ku cyoshelu cyà
Nzambì, ùDitèeka pa mishikù yèbè. . .? . . .

Akùlà, Mukalenge wanyì. . . 

64-0215 Bwenzeji
Elliott Auditorium
Tulare, Californie États-Unis

CILUBA

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijjiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org